

928
七
5

惜抱軒詩文集

五



惜抱軒詩集五


古體廿六首

夜讀

篝鐙每夜讀古人皆死矣而我百代下會其最深旨吟
諷至往復欲罷不可已安得與之論謂我能知彼今世
綴文者異世亦如此念此衷悽惻淚下如鉛水顧思文
載道筌蹠徒寄耳陋哉執此愛束縛作文士汝聞天籟
乎飄風滿空起

題汾州張太守墓廬圖

三代重廟祀燔祭禮所略義謂迎精返宮室專神託藏



欲弗得見豈事大興作所以脩防封孔聖涕隕落遂古墓不墳於義詎爲薄自從秦漢來闕宮禮銷鑠厭祭不迎尸同堂廢特禴廟輕墓乃重阡表極華燭所以上陵儀造自漢都雒仁孝旣屬茲福祐亦攸酢七略載相墓魏晉稱管郭大儒子朱子於焉頗采獲固欲先靈安匪繫俗見縛張君少孝養節母處幃幕板輿迎入越風木痛寥廓佳城猶未卜霜露走巖壑秉義諒無愆神感動求索面勢峯棱秀種樹柏樅錯鬱鬱氣佳哉晒想幽靈樂窻窻中安依丙舍外營度在晉陶士行元功表衡霍少日居潯陽牛眠藏父柳諒知神報德陰相啓窳約期

君功業隆異日登名爵善績史備書墓廬事不削

送胡豫生之山西趙城將訪乃翁舊知

晨朝雨歇石城水一挂江帆幾千里邀君小立白門前往事回頭四十年章江寒渚丹楓落乃翁共坐滕王閣詩情酒態天下豪旅舍生兒始繃縛湯餅眾客開登筵碩果惟余遲入柳渥洼種卒成權奇見爾文章繼翁作貧交令我慙叔孫駿足憐君無伯樂承家彈鋏向風塵有母尸養尙藜藿小倉亭戶拓玻瓈敗荷落桂沈秋泥主人昨日會賓飲綠尊滿捧青蛾低美人壯士各有思隨眾歡笑中含悽況到霜風河北岸襍被只餘僮僕伴

太行地脊天下雄汾水秋風古來歎晉中小邑猶萬家
往往車馬能豪華賢令聲名有遺思郎君憔悴宜矜嗟
我悲乃翁今不見衰盛人情孰無變男兒精金須百鍊
勉走塵埃莫辭倦豈有美若陳平乃貧賤

書樂志論後

大功濟一世富貴當崇高運會苟不逢引身入蓬蒿良
田及美宅誠免苦身勞既非先世遺求致寧非叨吾鄙
樂志論陳酒烹豚羔雖愈乾沒徒未爲肥遯豪不見陳
元龍牀下臥此曹

闕口阻風

一出金陵郭兩日北河口翻翻鍾阜雲背我逝蒼狗試

曳市廛杖迴飲王生酒墨香發笈外古色盈座右吳畫

奪造化黃字耀星斗

上河王養中家觀所藏書畫甚富
吾尤愛山谷道人書子建詩及吳

仲圭夏
邨圖

乃知此淹畱風伯意良厚自是飽挂帆卯行嘗

及西離家百里外故山當船首正及湖水闊忽起西風
吼引領吾徒羨銜尾來舸走停棹入菰蒲繫纜向榆柳
老翁晝夢醒試一憑船牖遙山紛冶麗下水亦清濁魚
艇夕陽邊楓葉零霜後雖乏古墨妙景物亦希有行止
要不礙愠喜兩無取默坐獨成詩橫肱進吾糗

次日又阻風

暮風聲已厲入夜尤洶洶有如九淵底怒起千鬪龍吾
舟繫樹本幾欲拔起從一夜枕席間鏗鎔如金鐘晨興
無日暉四野雲逢逢樹葉下如雨棲鳥無復容豈必大
木竅空響自相舂吾舟一長年擁袖衣蒙茸小舟自後
來所受可百鍾笑傲舞兩棹踴躍升斜篷此怯豈非夫
彼勇誠可庸吾知任事難坐譚第恣胸假令吾操舟畏
憊恐夏慵天道不能久既盈還當沖飄風明決止朝暾
望東峯遲行一日耳何必責犯鋒吾取老聃言挫銳萬
物宗

朱石君中丞視賑淮上途中見示長句次韻二首

此身未作龜藏六擾擾人間同一局春水常乘東下舫
霜林每引西還轂論材真似蒿蔚卑學道不如黃稗熟
先生伯仲才峻崇兩角去天幾一握文高萬士暗無聲
德盛千豪書可禿固應厮養皆人豪卻媿雕鐫加朽木
笥河已歎火傳薪使君今作凶年粟我從竹馬試迎車
但覺謙衷彌粥粥咳唾小且出千珠事業閔宐安萬屋
獨思舊夢五十年那得從容髮還綠

北臨潁尾南濤六壽春邑據東南局英布倔起逮劉安
豪傑興亾如轉轂列仙曾授鴻寶方下客猶吟楚詞熟
山川極盛在一朝鍾離帝起乾符握自是蕭條英雋無

情掄軒詩集五
四
艸木八公皆楮秃惟餘暴桀多劫人每犯刑科俾荷木
先生欲革小人面上書先請調均粟夜犯霜風走旆旌
往問飢寒散饘粥詩書猶且待陶甄桴鼓豈教驚井屋
鄰邦擾攘此安居淮甸麥豐桑柘綠

酬釋妙德

闍黎信者宿貌古神清完如尙處榛莽未入今世間與
之論俗情鈍若椎刺穿幾昧馬幾足況識機械于見人
輒談法不視憎喜顏科判捨經本誦解波瀾翻剖晰義
微妙賢首及慈恩古說久蒙晦光明興舌端乃知其中
利凜然持太淵聞者無愚知悟解增悲歡嗟我嘗脩心

勤在此生前自從一念失漂轉來塵寰譬若乘蜀舟東
下三峽關迅忽造海壖矯首求西還泝流青天上得不
勞且艱愛師秉直心啓予三昧門師亦喜我意不謂鄙
且頑相從宜不厭勿論暑與寒不待盛言說目擊道已
存

許秋巖太守問耕圖

先生伏首諸生日深耕疾耨惟研筆先生影纓登玉堂
鋪茶垂穎皆文章秉麾出作江東守欣戚時時念農畝
陰雨膏惟恐後期非種鋤還去爲莠男兒起任天下事
問舍求田非所志不恤四體昏作勞固將九域蒙吾利

一朝回首望邱園歲見成功惟樹藝君不見伏波將軍
不世才中興事業光雲臺營軍瘴霧沈鳶地苦憶平生
季弟哀又不見北宋盛時君子達韓范富歐同禁闥偶
聞鶻鳩數聲唳忽念隴頭耕曉月此圖有士何美髯豐
玉饑穀茲身兼繫君節鉞與華袞那容短褐從腰鎌感
事撫躬成一歎寫圖非戲非爲幻無人得喻使君懷官
舍把圖時自玩我謂才難自古然士如麟角偶一焉教
民樹藝且一事只今百務須旬宣慷慨建樹窮歲月誓
如穠蔭亦有年志業精勤信諸已進退早暮從諸天或
圖麟閣或歸田請君置此中情牽周公未遂明農志何

紛紛後世賢

米友仁楚江風雨圖卷

王養中藏後有友仁自題
七言詩

萬山欲駕雲飛去風雨江聲挾東注波翻雨橫客登樓
天地渾茫不知處藤崖高下懸太陰霾霧冥濛露江樹
颯颯風漂勁柯動急雨小停江浪涌低昂島渚數舟行
寂寞魚龍暮天恐楚江晴甸亦蒼茫況值蕭條風雨涼
山鬼含睇帝子怨海洲忽近吳天荒破墨氤氳載元氣
胸前突出山川勢不須慘淡擬形模元是分明出層次
君不見阿章早許元暉繼楚山已進先皇秘此圖卷末
復題詩南朝又見顛翁字父子崢嶸書畫學江山慨歎

遷移事五百年來江自流江城余亦澹淹畱俗來寶墨
流虹卷且慰無慘風雨秋

題句容學博馮墨香小照

我於江寧城始接馮君頽蕭靜有古韻當座展圭瑁固
知其中異清絕遠塵淖而今對此圖睇視日增眊審知
爲子真指說賴前告寫真自古難神藝有深造點睛加
頰豪用意孰能到後世圖太多往往雜仁醜卷軸紛牛
毛題詠亂蟬噪君實精六法自摹山水樂咎賢縑素遺
窮辨極交奧倉卒命俗工胡亦同眾好想處山澤儀局
以入黷校士有笑吟披奠乃分臂臚學舍小如舟請鄰

仍祀竈誰知曠世懷天宇大哉警抑鬱無與言寫圖寔
寄傲工拙固勿論似否亦弗較譬若影罔兩等是無持
操又若太虛雲約略狀旌纛與古寫真意迹本不同蹈
此理如不然姑縱吾言耄雨霽天欲霜候迫風落帽邀
子野鶴態試鼓青谿櫂一醉酬廩秋相對遽然覺

王麓臺山水

幽谷蒼蒼擁煙樹樹底明流沙石布畫中取勢作低平
已是人閒最高處倚谷崖石千萬層嶽峯仰映天光激
暖攀獸顧不可登石根砰隱谷風響崖後別盤幽徑上
峯迴徑轉山仍開畝有禾黍林松梅結構精舍當其隈

夔貫倒景出高嶂鬼神所會騰雲臺若憑絕頂眺萬里
脫屣人間何有哉侍郎起家入華省貴仕何由造茲境
染豪興至成此奇乃知妙悟通神領我筇孤藤極幽險
溼雲常與襟裾染窮山或至絕齋糧日取谿毛供一噉
呼吸瓊樓碧漢通近郭山谿皆可貶一往真當絕世塵
卻來平地望高旻春秋郊野雜眾賓此圖於我情獨親
臥遊雖慰平生意欲策衰慵更問津

瀟湘圖

王宸畫

雲霽出楓林烟深停水驛來往石崖間迷離竟朝夕欲
畫暖嘒聲寒峯數重碧

贈孫雨窗

秋風吹蕩秦淮白老翁獨行成落魄故交死喪新知少
晚逢公子敬愛客牙籤玉軸綾縹湘貫虹妙墨千金藏
茶香竹淨好風日請我俛仰前賢秀我如落葉枯桐峻
寒聲時起無妍潤莫愁湖上可憐春花柳宐君美才俊
何事愛我詩句奇往往耽吟燭花燼謂當四海同一情
更召木工急雕印桂花落盡黃花開我爲扶筇時一來
念子嚴君連帥首心愍民憂走羣部公子閉門止讀書
不近少年親老叟異哉公子今安有古有名家繼前後
勗子以方報瓊玖

碩士約過舍久俟不至余將渡江畱書與之成六

十六韻

敦牂歲三月桃李羣飛花東望鍾阜雲風帆待江涯欲
發不能決橋首背負鬢吾堂子昔登寒梅照檐刃子去
歲幾何三見青艸芽俄聞子將來笑口成啣斜望子翔
鴈初被稷今鳴笳做廬長掩闔不聞扣馬槌豈以積雨
多攤舍限泥塗抑或戀厠臉日侍欣清嘉戒徒久易期
卒未成巾車吾行不可畱子來日猶賒閒闊終不逢顧
念深咨嗟聞子官舍中弦管謝嘔呀夜誦或鳴雞晝披
逮昏鴉裁爲五色文爛若開晨轂元年求孝廉 詔紙

頌南衙郡舉尙遺賢有才爲免置子子處士中燦燦金
居沙射宮萬碎易一矢行拔鞞我老又多疾析若枯蒼
葭兀爾默終日短榻支僧跏食案廢脫作毛羽哀剗剗
嚶聞求友聲一一皆頻伽唯有文字習癢不禁搔爬仰
惟聖有作豈以文矜夸奇麗光至今迺逾初日茄其中
矩矱存已足範奇衰後賢但有述敢擬作者媿譬若鏤
之而畫繪鳥獸蛇巧工棄常度拙工藝反加一失外形
體豈復中精華在管明中葉才傑蹈高遐比擬誠太過
未失詩人葩蒙叟好異論舌端騁鏤鄒抑人爲己名所
惡成創痂眾士遭豐沛皎月淪昏暮我朝王新城稍辨

造漢槎才力未極閎要足裁淫哇豈意羣兒愚迺敢橫
疵瑕我觀士腹中一俗乃瘕瘕束書都不觀恣口如鬧
蛙公安及竟陵齒冷誠非佳古今一邱貉詎可爲擇差
所貴士卓識不受眾紛挐朗然秉獨鑒豈必蓬生麻我
雖辨正塗才弱非騏驎願子因吾說巨若隄引瓜吾舍
倚龍眠青嵐壓闔閭中有太傅墳咎是公麟家子來我
雖去風景猶可誇試停行道驂拄策揆哈岬誦我前日
詩酌彼新焙茶清嘯發巖中大勝諧箏琶吾曩游南昌
鉅邑觀閎奢顯慶帝子閣西山明列娃去之四十年顯
字行涎蝸子家有舊園吾迹荒蔓遮子往定憶吾北望

天垂霞吾非山斗倫不詆排釋迦頗與同好奇結友宐
全義秀句成見寄豈不珍朋虵日月兩馳輪形駭一棲
苴何暇競一世口大身如椰卮言聊一放閉口終毘耶
耿耿遺子志母嫌吾道滂

題謝蘊山方伯蘇潭圖

南昌山色如青玉下照澂江千里綠倚江都會賢俊居
各起亭臺帶修竹先生小園堂數弓聚書萬卷花萼紅
四方名士春秋同舉觴吟嘯於其中遊賞年年情未足
世推豐玉兼饑穀使節東領黃河隄法冠北上太行麓
獨於錢塘治績多來旬再莅西湖曲杭州前後瞻蘇公

先生事與東坡同小園舊以蘇潭命或疑前定天所通
識占小數何足道先生本憶南康好因懷蘇步作蘇潭
更著新圖寫昔抱君不見安石東山在越中金陵亦託
東山號當時曾治循海裝中原事定思一航威儀山澤
百世芳遠述祖德何能忘功名卓越人間事自古男兒
悲故鄉

弔朱二亭賞

吾年垂七十四海故人少東望每思君如立雲霞表往
昔朱子穎豪才起燕趙向我道君才五言幾謝朓子穎
貧無食子亦家集蓼相從邗溝曲吟和觴清醪我時隔

京師想見姣人僚丙申至江都遂得訪窈窕其時子穎
貫冠葢頗叢繞君顧無所干陋巷閉門悄扣闥就談詩
但覺風嫋嫋舟乏仲舉同書絕巨源鵬獨荷時見阿累
投珠玉晶惜哉近子舍攝提僅三肇我歸子穎罷舊迹
如逝鳥一別二十年中未脫塵擾激懷實愧君高與秋
旻杳子出諒不能吾遊尙可紹行當一相就帆挂橫江
淼昨得郎君書已設韜練旒豈但悲友生問道苦不了
君疾正月初一榻兒女繞呼與告逝期屈指七日剝眉
時一笑亾何嘗貳壽夭銜哀遠弔君諒為君所小那復
弄毫翰繁詞報劉沼

題劉雲房少宰滌硯圖

侍郎誠意之子孫亦統御史風憲存自從弱冠登金門
湘東才子弟與昆拭硯濡毫書 國恩豈似犁眉少遭
亂晚逢真主猶憂煩誠意江南舊門閥侍郎四執江南
節研吐雲霞霄漢間筆驅風雨蛟龍窟四海文章見師
表累代風流推繼述內侍寧誇金氏貂傳家惟奉鄭公
笏竣使重當入金殿裝橐依然藏一研 聖人前席或
咨猷史官舍墨裁佳傳侍郎德業垂無窮硯也既久從
有功卻顧江南老秃翁猥稱當代一文雄豈知心氣今
搖落況復逃禪文字空松煤竹管行拋棄蕉白紅絲塵

自封

登天平山觀白雲泉

萬木塞崕岬環巖抱秋靜激泓中一池導源仰幽篁壓
頂累穹石側足折微徑略可半畝平深隱小潭瑩酌口
識清甘煩慮豁開醒僧牕啓絕壁遠納湖光淨晒彼支
遠智屬此魚鳥性誰與送歸途松風澹遙聽

觀飛來峯入靈隱寺由寺西上韜光菴乃北高峯

上也

連山聳西南水勢東北趨山蟠四十里障合中成湖矯
矯北高峯獨瞰西南隅高下測三二乃是韜光居靈隱

古名寺所處實山跼門外地如砥奇峯矗覆壺中空四
穿達立距疑神扶所以西域僧謂是鷲嶺逋造說固詭
異度形疑非誣九月未肅霜嶺木猶榮敷我從湖尾來
橫截乃西逾日薄桑陰閒舍舟入籃輿遂造飛來峯鑿
刻多佛圖題名自元豐指顧雜賢愚秋壑見子中飛來峯有
林希賈似道等題名想亦加邪歛發我一長歎舍之入僧廬琳宮
既巍傑巨鑊中容車不識飯干僧中有龍象無萬竹繞
一逕登陟方縈紆幽谷微風來冷然寒肌膚俯視羣山
卑乃知所立殊內湖而外江驚潮見天吳蒼然浮數翠
未得其名呼略辨浙水東僧言蕭山區仙人遺丹竈聊

一窺其窾長生固非願遺物卽道腴徘徊未忍去曦影
俄西晡山川自清麗迹過如烏烏悵懷幽興極寫託天
雲孤

戊午九月十四日出雲棲寺作

萬樹納幽光峯頂日初到寺樓人始啓四嶺鳥羣噪鐘
磬隱虛堂蔬水薦僧竈門與道人別逕有脩篁導澶迴
將出谷陰森猶入奧返瞻昨履地木末一峯冒茲生入
世網空玉實先覺豈不被聲聞所病無持操是以雲棲
門堅持一佛號要取同趨歸非謂異宗教睠焉顧其室
喟然發中悼焚和從一念繫物沮高蹈旣厭流俗靡豈

耽山水樂終辭弱喪情屬爲知者道

次韻答秦小峴觀察贈別併以別謝蘊山方伯

我如行雲向九州飄然一往不可留東南烟水一千里
挂帆曲轉楓林秋西湖絕景四面好北客拄杖十日遊
夜月披襟倚湖檻曉烟聽榜搖湖舟竭往山深友麋鹿
歸從水宿同鳧鷗兩君丰采古賢伯亦邀賓客探奇幽
孤山處士余所慕香山玉局君之儔四賢祠前共遊舫
魚蟹菱芡新登箸恪官事異元豐世豈開魚鑰貪林邱
斜陽欲盡旌旆返野人朝亦生離愁從來佳處不可盡
安用萬壑窮兩眸主人雖賢客當去徑買輕舸隨北流

兩君各示七言妙扣缶詎和編鐘璆使君文章配旄節
漫士踪迹同漂漚敢期一事嗣前古培隄去葑仰令猶
想公更遊水深闊倒浸南北山僧樓

惠山寺觀

御賜寺內王紱溪山漁隱卷歌

秋陰細雨梁溪前停舸往酌第二泉石巖偃仰神所窟
密林寒邃風冷然泉東穿過惠山寺我從拄杖尋幽異
山僧手持王紱卷語我前年寺中事火燼竹鑪山房圖
吏傳 天府琳琅賜晃曜日月升虹霓山僧室內瞻
御題次看王畫果神妙清深意境窮天倪山長水遠合

氣勢人家漁艇從幽棲武林溪口落花出西塞山外斜
陽低豈徒畫師今莫躋孟端自喜非常蹊三處題詩兩
番記宐升秘笈同璋珪我聞貞觀天子求僧室閭檻蘭
亭一朝失英主嗜好乃如此豈如緙縹宮庭出翰墨風
流異代情 明廷故實邨氓述況記此間迎 翠華寄
暢園蒙頻 駐蹕不賢識小宐作歌大政元存史臣筆
青華閣帖三卷紹興御刻皆二王書後有釋文余
頗辨其誤復跋一詩

蒼頡始作書已聞夜鬼哭官民信治察淳樸存有幾何
況尙草法几牖駭蛇虺筆勢取奔趨形體雜變藪多寡

亂馬足左右錯丁尾假如羲獻存翰墨矜有斐試箝文
上下自讀口亦悻儒者厭草書所識詎不躋傷哉宋南
渡國有存陳唏鐵馬苟臨江所憂杭一葦柰何耽安燕
宮苑豔禮卉近擬大觀年取法寔比匪鐫工聚樂石名
帖啓籛篚帝后各擅書親釋文如螳吾今適無事舊冊
陳几斐頗亦從俗嗜驤騰震瑰瑋默對淹永日錯昧瞰
與拙舊釋或得失吾說亦葑菲古帖殘闕餘誰能誦媿
媿盍各陳小辨聊於博奕偉若夫大雅才自命則吾豈
方天民 獨覺 次韻余少在京師與朱竹君王禹卿
酬和長句見贈又示病起五言用其病起韻荅之

大哉天地化縱視忘形拘耳目乃可遺況識肥與臞將
適汾水陽首謁冰雪膚徑凌天地度衽拂扶桑株俯短
龜鶴齡詎與蜉蝣殊聖凡本無隔妙道藏頑軀聖門講
六經抑或營廢居若論微言絕二者皆可吁陳魚取乙
鬣顧已遺腴膺吾幼耽文章矻矻不知愚二十八京師
兩漢希閎樞斯文有先驥朱王騁高衢揚班以見待竝
謂詡匪誣灑墨疾風雨往復競裁觚投老自愍惜雕蟲
穉子俱我棄良晚矣子取非過歟少小同研席里閨多
歡娛秋燕匹故人室存形影徂獨君臥冬巷久病幸一
蘇短日發長詠走餽逾苞苴我誦雪牕前意驟興繫駒

終願超言象共子遊虛無呵毫罷一笑升瞰煌八區

題外甥馬器之長夏校經圖

聖人不可作遺經啓蒙愚大義乖復明實賴宋諸儒其
言若澹泊其旨乃膏腴我朝百年來教學秉程朱博
聞強識士論經良補其大小則有辨豈謂循異塗奈何
習轉勝意縱而辭誣競言能漢學瑣細搜殘餘至寧取
讖緯而肆詆河圖從風道後學才傑實唱于以異尙爲
名聖學毋乃蕪言多及大人周亂兆有初彼以不學敝
今學亦可虞嗟吾本孤立識謬才復拘抱志不得朋嘅
歎終田廬甥有吾家性禮部方升書才當爲世用勉自

惜抱軒詩集卷五
正所趨矻矻校遺經用意寧投虛盛夏示我卷秋葉今
零株至道無變更景物乃須臾僞學縱有禁道德終昌
舒試觀宋元間士盛東南隅以視後世賢人物誠何如
願甥取吾說守拙終不渝

惜抱軒詩集六

今體七十九首

夜抵樅陽

輕帆挂與白雲來棹擊中流天倒開五月江聲千里客
夜深同到射蛟臺

山行

布穀飛飛勸早耕春鋤撲撲趁初晴千層石樹通行路
一帶山田放水聲

貴池道中

曉過池州郭人家傍曲谿白花臨岸發青艸度江齊秋

浦殘林雨春山徧竹雞東樓懷李白風日至今迷

黟縣道中

蒼翠壓人低流雲落大谿連巖巖艸日懸澄帶陰霓雨
歇羣山響春深萬木齊寥寥方久立谷鳥一爲嘯

出池州

桃花霧繞碧谿頭春水才通楊葉洲四面青山花萬點
緩風搖榜出池州

江上竹枝辭

滔滔無際是秋瀾估客牽江泊夜灘江岸唱歌江上聽
不知風雨爲誰寒

蕪湖山露小於船池口銅陵山接連那得青山江岸盡
止應西上到青天

年年八月旺潮期送潮送到小姑祠惟有滿天風共雨
小姑祠上送郎時
東風送客上江船西風催客下江船天公若肯如儂願
便作西風吹一年

古意

青柳高樓白馬駒五陵春醉酒家胡君家新市長安少
臣里佳人楚國無狂下願爲莞蒨席與郎儂作博山鑪
東風門外薜蘿晚更折瑤華向路隅

效西崑體四首

咸陽

斬年宮外八川流輦道環通徧雍州
萬里鼉鼉橫碧海六王鐘鼓在朱樓
地中闕表終南肺天上城開太華旒
獨令上林辭賦客曲江蕭瑟不勝愁

渚宮

樓觀雲陽入窈冥兩東門對楚山青
錦帆暮雨迴江渚鳴籟雄風起洞庭
北望六雙飛鷺鴈西來五尺困蜻蜓
渚宮衰艸秋風裏愁絕當年帝女靈

洛陽

洛陽形勝匹西秦累葉章陵氣尙新
甲第雙嶠如黽谷芳林九派似江濱
生前父有張常侍死後兒還史道人
借問西園冠蓋盡溼螢飛暗小平津

越臺

臣佗事漢抱孫年滄海無波阜井廛
嶠嶠春臺餘總帳牂柯秋水下樓船
空詢萬里番禺醬不及千金好時田
一自建章荆棘後越巫方夏與誰傳

寄和劉海峯三丈游伊闕之作

聞去梁園超廣武西登闕塞眺黃河
伊陽風雨從中出洛下山川向北多
白髮上賓聊自許青春歸興復如何

且從浩蕩詩懷劇莫念沈淪壯歲過

寺寓贈左一青

南北風煙萬里深對君王舍有香林春來夜夜江南夢
不及高齋聽雨心

送一青歸因寄仲郭

與君兄弟夙相依洛下今年遇陸機天末四愁思莫致
秋來九辨送將歸行窮南汶山初見吟到澄江葉盡飛
若把迷方語鄉里更憐心事卜居違

出塞

連營鼓角夜星環擐甲弓刀曉露閒列障三邊開幕府

勒兵萬騎出蕭關黃河日落人旋渡青海春深鴈未還
聞道南庭先效順輕車齊會涿邪山

八月十五日與朱子穎

孝純

王禹卿

文治

集黑窰

廠

寒吹動關河登臺白日俄孤雲高渤海秋色渡滹沱海
內詞人在尊前往事多夜來明月上烏鵲意如何

送人往鄴

九月燕郊艸尚青送君且爲住郵亭明朝月落漳河曉
無限飛鴻不可聽

贈戴東原

新聞高論詘田巴槐市秋來步落花羣士盛衰占碩果
六經明晦望萌芽漢儒止數揚雄氏魯使猶迷顏闔家
未必蒲輪徵晚至卽今名已動京華

寄仲郛

天外思將新歲酒雪中同醉故人家折梅憶客楚江遠
凍竹閉門山郭斜春晝鋤犁無素業少年詞賦共青霞
長安溝柳看垂發直恐相望到鬢華

天門山

萬里江流斷雙崖地脈通冥冥浮積氣漠漠送長風滄
海孤帆外神州落照中人生如鳥迹獨上俯鴻蒙

望潛山

道邊隻埃復隻埃天半大山宮小山客子出林暮喚渡
居人微雨寒閉關橫空積樹雲漠漠交流斷逕谿潺潺
不知蒼谷最深處喬松白鶴誰往還

由宿松向黃梅

秋山紅葉重煙樹暮巖鐘水澹松茲郭月生天柱峯人
閒二南嶽江上六禪宗悵望停車者征途何所從

宿德化縣

南行三百里舉首白雲端大壑連陰靄中天峙碧巒夜
潮千嶂閉明月九江寒夏就東林宿蕭條鐘磬闌

題負薪圖

落葉被逕行客稀晚風吹樹斜陽微空山短日惜餘景
野老長鑿甘息機瀑流側足巨巖響峯高倚杖秋雲飛
邨林春黍戶將閉寒谷束荆人未歸

南昌竹枝辭

南昌南去盡山谿白石清沙不見泥一到鄱陽風浪黑
行人那更出江西

城邊江內出新洲南北彎彎客纜舟莫上滕王閣前望
青天無地斷江流

石鐘山

挂帆初月出風起大孤塘遙夜來湖口江天寒淼茫石
潭流激激巖樹鬱蒼蒼千載元豐士風流何可忘

出湖口

扁舟昨夜泊湖涯霜重蘆枯宿鴈知朝日忽生彭澤縣
挂帆無數小姑祠

送客之南昌

野曠深春艸江空起夏雲樅陽更西上日日見匡君

寄友

千仞青巖萬壑雲舜家籐杖謁匡君玉簫吹處非人世
江上秋風偶一聞

郡樓寓目

檻前洲渚後山坳劇郡樓臺艸樹交白霧乍開人入市
丹林猶綴鶴歸巢授衣霜露齊民節倚劔江天大國郊
竟作陳登牀下客長鑱思訪地肥境

由郡城適樅陽漫詠

淼淼江流汎楫維蕭蕭岸戍見旌旗斜陽萬里背人去
落葉千聲與客悲寂寞子雲期後世蒼茫詹尹謝先知
青山滿目身無累惟有憑磯坐罟師

關山月

遼海初生月長城幾度秋夜吹羌管笛風滿戍亭樓紫

塞斜銀漢青天澹玉鉤如何渭橋渡止道似牽牛

秦宮辭

挾瑟佳人載輦行渭南秋月綺羅情秦皇夢聽邯鄲曲
不及叢臺夜宴聲

露下梧桐墜井欄滿宮明月見君難傳聞博浪霓旌過
磁石宮門閉夜寒

漢宮辭四首

君王武帳御船樓一片旌旗拂女牛日晚移舟鳴趙瑟
昆明池上月如鉤

井榦樓上見飛塵宛馬新來集渭濱欲詔海西先涕泣

帷中誰報李夫人

關外花迎帳殿開
篋篋隨上射蛟臺
柳邊細馬雕鞍過
新自河閒望氣來

金罍春殿酌瓊漿
夜賜黃門樂府倡
三十六宮歌舞地
一時風靜玉階涼

黃河曲

負羽千營臂角端
平明卷幕北風寒
青天西挂黃河水
立馬長榆塞外看

黃河繚繞漠南山
秋盡蒲昌鴈盡還
萬里白雲飛不去
朝朝長結玉門關

山行

石徑幽巖竟日曛
杖藤行逐遠樵間
縱無世外冥鴻翼
猶夢林閒野鹿羣
春渚大桃無雜樹
暮天殘雨有行雲
故人谿口如相問
何物空山可贈君

一青仲孚往金陵屬訪耕南三丈消息

域中前輩盡殯顏
混迹劉伶尙閉關
孤艇著書江水上
百年閱世酒尊閒
天邊落木流楊子
秋盡寒雲出蔣山
若憶團亭舊漁釣
挂帆明月共君還

榆中

直北天低見磧山
黃河南下曲如環
白榆夜雜雕戈戍

青艸春稀牧馬還寒吹滿空雲出塞暮天無色日平關
千秋猶對秦時月多少功名大漠閒

初雪憶去年是時經潛山下

窗外聞風竹綠階雪遂深我思山谷寺天遠大江陰石
氣青霞嶂秋聲黃葉林更穿巖徑去應阻故人尋

送左冠倫丈往平羅

萬里靈州外孤懷焉可論關山疑路盡士馬尙秋屯河
水流中國寒陽下塞門重開漢四郡豪傑幾家存

南朝

宮雉南朝接玉繩幾年金掌露華承衣冠志節悲終始
艸莽英雄有廢興海壯五州開北府江通三峽督西陵
銷沈轉眼愁隨主欲作長城更不能

登報恩寺塔

山迴煙繞出浮圖迥踏青霄萬里孤
斷鴈秋雲飄莽蒼高費飛閣散榛蕪
江風颯颯吹天日海氣昏昏浸楚吳
多少人閒興廢理蔣山松柏正模糊

登永濟寺閣寺是中山王舊園

中山王亦起臨濠萬馬中原返節旄
坊第大功酬上將江天小閣坐人豪
綺羅昔有巖花見鐘磬今流石殿高
憑檻碧雲飛鳥外夕陽天壓廣陵濤

金陵曉發

湖海茫茫曉未分，風煙漠漠棹還聞。
連宵雪壓橫江水，半壁山騰建業雲。
春氣臥龍將跋浪，寒天斲鴈不成羣。
乘潮鼓楫離淮口，擊劍悲歌下海濱。

丹徒寓樓上作

鬱鬱山川面倚樓，側身江左舊徐州。
寒潮不隔中原望，白日遙懸大海流。
北府千年京口鎮，西風一夜秣陵舟。
古今只此滄波色，煙霧何時竟掉頭。

望岱

峻極通天地，陰陽辨魯齊。
連峯渤海外，流畎穆陵西。
樹

據金輿路雲深，玉檢泥山川供効。
佞千載一淒迷。

泊臨清漳口

泊舟寒渚對衰裒，岸木蒼蒼水鏡開。
滄海霧搖孤月上，青天影合二流來。
平生苦憶清江櫂，深夜休嫌濁酒杯。
明發風帆好停處，拂衣先上魯連臺。

由張秋至汶上口號四首

汶川千里路漫漫，三峽船如上閘難。
篷底春風九十日，穀城山隔缺隄看。

細艸春陰碧四圍，空隄花落燕初飛。
澹雲何處飄殘雨，迎取魚山神女歸。

風定遙山水面青垂楊不見釣舟停晚來忽唱橈歌去
疑載高人小洞庭

帆前莽蒼暗平蕪風雨神靈定有無一片雲遮分水廟
四垂天入蜀山湖

太白樓

李白任城住於今九百秋青天東海月長爲挂南樓三
月楊花雪餘春客濟州憑闌空汶水相憶下滄洲

濟寧城東酒樓憶亾友馬牧儕

汶河垂柳萬枝輕把酒高樓對馬卿十四年來兩行淚
春風重過濟州城

河上雜詩四首

碭沛蟠紆接下相風雲咫尺會舟航中原日落關城白
西楚河來天地黃山閉彭門千里暮林開祠廟一陂荒
背關懷此君休笑自古男兒悲故鄉

海上晴天雷雨厯驚濤奔入亂山開青冥楚越孤帆去
浩蕩淮沂四面來春艸不知韓信里秋風曾到項王臺
誰明鼓檝中悲慨仰視雲霄數鴈迴

使者治隄久未還東南波浪海雲閒只愁天上桃花水
漫失淮南桂樹山任土司農操戶版薄征都尉且河關
勤憂中澤須良吏又待 霓旌問里闈

南登楚岸出楓林回首天邊萬里心
日月空濛探海窟魚龍縹緲踏春陰
故人京洛思朝夕鷗鳥滄波自古今
河上近連江上路蒼蒼千嶂碧煙深

淮上有懷

吳鉤結客佩秋霜臨別燕郊各盡觴
艸色獨隨孤棹遠淮陰春盡水茫茫

淮陰釣臺

人傑乘時會功成運已非可憐高鳥盡
回憶釣魚磯淮上春風起高臺柳絮飛
王孫殊未反惆悵落斜暉

畱別揚州諸君

年少諸郎各俊才要余夜盡廣陵栢
明月相隨天際去思君還傍月邊來

由儀真至滁州口號三首

醉點紅燈碧樹明夜看亭閣廣陵城
醒來忽向蒼山路獨聽寒松曲澗聲

初日牆隅出未高孤花叢樾閒相遭
陂塘行度重陰底惟有蛙聲和桔槔

陰陰巖偃蒼龍腹片片雲飛白鶴翎
江浦縣南來暮雨滁州山露半邊青

寄潞川

江雲萬重合中有故人行西風吹落照一半向蕪城
君家種新竹牆陰雨中長若爲北窗來蕭蕭數聲響

南陵送渭川

楚澤橫千里登高望不分山城正風雪江路忽逢君歲
晏梅初坼長宵酒易醺只愁明發去空水與寒雲

過江浦縣

江出天門雲水長客心孤迴路蒼茫寒山自繞涂中碧
不與斜暉過歷陽

徐州

霽雪城頭戲馬場憑城三面瞰蒼涼河流畫地分中夏
雲氣隨風出大荒竟入山林惟孔令遠求風雅獨元王
閒關此日方爲客殘照天涯數鴈行

邳州

遼濶山川縱遠游又欵風帽過邳州千秋遺蹟尋黃石
一片寒陽下白樓難得真龍逢漢帝易將窮虎縛溫侯
英雄潦倒尋常事惜與曹瞞作畫籌

過汶上弔王彥章

楊劉兵度大梁危飲泣猶當奮一麾亂世烏飛難擇木
男兒豹死白留皮天連白艸橫殘壘日落陰風擁大旗
莫問夾河爭戰地渾流徙去黍離離

惜抱軒詩集七

今體六十九首

戲贈山陰陶生

凜立塵中面渥丹自言鴻寶受劉安
貧無素業彈長鋏行入朱門著小冠
候日竟知中景再談天始識九州寬
東方惜未遭時會僂作蘇張未是難

戲贈宏夫兄

昂藏七尺氣縱橫篋內中宵寶劍鳴屠市
故人從偶語屏風侍史不知名鬢華攬鏡
增霜雪曾智探囊有甲兵仍作棄繻關內
客西風吹短曼胡纓

戲贈鄞章生

山澤歌謳自負薪誰招跌宕入京塵翹身曳步驚風止
蹙鬪魑顏擬聖人捫蝨九流隨俯仰雕龍萬古會精神
若教一與貂蟬列便作當時折檻臣

蔡萬資履元水鄉菱藕圖

平湖秋擢木蘭船醉入汀花弄碧煙日暮都忘天近遠
坐看明月到尊前

綠萍白芷春陂生菱葉藕花秋氣清語兒涇畔各含思
爲待先生吹笛行

隔岸越山青倒開花光湖影照裴裒圖成張向西風裏

野鶴天邊飛欲來

寄仲孚應宿

蟲臂觀生非有象馬肝持論故無親虛名那辨星牽輓
猛士難翻日轉輪但使琴漁從叔夜不妨櫻筍送殘春
白雲憑語相思劇三月谿山兩故人

送曹效伯司務歸里

觚棱回首暮雲空拂袖歸途似御風解厭奔趨將虎子
定無喜怒爲狙公故人長揖都亭外新月多情滄海東
行上成山絕天碧早知蓬閣落梧中

送左墨谿往貴州

何處黔中郡憐君最少時今猶借旅食明復送將離夏
口經春闊辰陽到日遲臨岐無以慰迴鴈與歸期

法源寺

時張樊川侍讀引疾同游

臥碣唐朝寺春階上艸芽客來清磬歇鳥啁夕陽斜筒
水澆青圃檐風隕白花欲借投絨老終日問楞迦

同秦澹初

雄飛

道長朱克齋

岐

王蘭圃

士棻

兩比

部游洪恩寺時秦王將往主山西試僕與克齋赴

山東

古寺松杉一鳥鳴初噉煙霧兩階清風幡秋氣飄鐘磬
艸木晴嵐入檻楹坐倚團蒲身近遠出看車轍路縱橫

明朝相憶皆千里那易僧窗啜茗

賦得昭烈宅

涿水東流艸樹荒千秋已比沛中陽依然桑蓋垂籬落
誰種蕪菁負曉霜高臥登樓豪自許入山披髮意非狂
平生髀肉銷鞍馬游子何任悲故鄉

張方伯

諱秉文祠

歷數天將改藩籬國早亾士餘忠壯志家在戰爭場女
烈甘懷石臣心盡布裳同閭悲舊史異代入祠堂樹積
陰雲黑旗翻落日黃行游魂魄毅溟海地茫茫

密雲縣

當道孤城一水邊
漁陽斜照隔城懸
斷崖朔吹來陰地
連塞橫山蔽遠天
設險檀州防禦所
建安褚令壑湮年
男兒未辦安邊策
略借曹瞞定損賢

清苑望郎山有懷朱克齋

時知衛輝府

男兒三十分銅竹
多少功名到白頭
紫陌鶯花故人牘
黃河風雨郡城樓
欲將北海同樽酒
遶盡西山到衛州
回首數峯蒼翠在
幾人能不憶林邱

定州

東橫海右中山國
西接天邊御射臺
辨瀉獲君從古少
成功食子令人哀
飛流倒馬關中出
急雨盧龍塞外來

欲下高原更迴首
尙疑奇士在蒿萊

呂翁祠

白荷花照水娟娟
綠柳千條壞檻前
午過微陰行客倦
呂翁祠畔聽秋蟬

邯鄲口號

邯鄲妙伎繡襦衣
屣屣無雙鼓瑟希
止作低頭廝養婦
不如匍匐壽陵歸
錐囊有意來成市
玉貌無端亦被圍
秋色滿空吾徑醉
西山當面挂斜暉

彰德懷古

鞞鐸居然擁伯才
地蟠河朔氣佳哉
丹崖秋幸黃華館

玉貌春歌金鳳臺
漳水東流何日盡
高城西對夕陽開
獨憐石柱平城去
猶似銅人洛下來

疑塚

祖虞胄稷兩難求
枯骨誰知屬夏侯
邢史何嘗識天道
邾婁家盡大長秋

蕩陰有懷嵇侍中

晉朝城壘結愁雲
播蕩金輿此戰氛
事去萇宏猶有血
時危孺葛不能軍
冥鴻物外誰當篡
野鶴雞中故不羣
西望山陽林竹盡
寒聲蕭瑟詎堪聞

洪縣

曉色高原上
連山夾路隅
單車度淇水
秋雨綠王芻
聞道青巘迹
長懷隱者徒
林巒深翳蔚
中有片雲孤

黃陂道中

故鄉東望隔齊安
馬首才旋去不難
略似霸陵臨渭上
瑟聲清怨走邯鄲

懷葉書山庶子

遺學千秋賴服膺
閉門白首向青鐙
伏生老有殘經懼
韓愈師爲舉世憎
終夜思公今底柱
秋風吹客又巴陵
滔滔身世成何事
愧憶當年許代興

懷劉海峯先生

先生高臥楚雲旁
賤子飄搖每憶鄉
四海但知存父執
一鳴嘗記值孫陽
於今耽酒能多少
他日奇文恐散亡
脫足耦耕如未晚
百年吾亦髮蒼蒼

懷王禹卿太守

大江五月水湯湯
送爾西南守夜郎
聞道還家生白髮
可憐解印縱清狂
天垂襄漢涵秋色
水下金焦接大荒
青艸洞庭還獨去
空山樅桂渺相望

懷程魚門舍人

淮南倒屣盡賢賓
綸閣今稱老舍人
潦倒青春長似醉
交游白首每如新
一椽託足終何處
四海知髯故絕倫

惟有詩情渾不減
獨吟今夕莫傷神

渡江

秋風生郡外江漢
合舟前靄靄列城
樹搖搖長薄煙南
州殊未極西嶂正
蒼然不識臨崖叟
垂綸復幾年

官塘

碧雲巖壑盤遙勢
斜日榛林映晚清
澗虎欲來風滿谷
四山秋葉一時鳴

萬年庵次劉石菴韻以呈補山

驛路陰將雨林深
烏不喧遠風來習
習涼葉忽翻翻野
曠蟲何怨秋成物
自恩迴依僧舍憩
寒水靜當門

觀化吾生眇焉知從古年平生聞赤壁邀客上青煙霧
雨藏南嶽江湖蕩左偏前峯猶自遠未可盡夤緣

前輩輜軒過風流憶宛然人隨寒鴈遠迹付野僧傳礪

戶藏秋小虛空放咀圓欲窮生滅理雲影在諸天

壁有吾鄉

張鏡壑閣學詩
今年閣學止矣

湘陰

雨積湘東行客難
嗁鵞楓樹四山寒
晚日黃陵戍前出
湖雲江水白漫漫

道中回寄長沙諸君

日月行踪兩不留
新交故友孰從游
歸人夜夜聽山雨

落鴈聲聲下郡樓
萬壑盤來趨鄂渚
千峯斷處是潭州
別離倏忽真成老
青艸湖邊對暮秋

岳州城上

高接雲霄下石磯
城頭終日敞清暉
孤筇落照同千里
白水青天各四圍
山自衡陽皆北向
鴈過江外更南飛
人閒好景湘波上
卻照新生白髮歸

夜起岳陽樓見月

高樓深夜靜秋空
蕩蕩江湖積氣通
萬頃波平天四面
九霄風定月當中
雲閒朱鳥峯何處
水上蒼龍瑟未終
便欲拂衣瓊島外
止畱清嘯落湘東

漢口竹枝辭

揚州錦繡越州醅巨木如山寫蜀材黃鶴樓頭望燈火
夜深江北估船來

蜀江水長漢江低江水東流也向西霜後西風江盡落
可憐離別漢陽隄

信陽

已逢秋鴈下江沱夏望飛蓬捲大河短日人行鄙阨少
長淮山繞義陽多水源四瀆思乘橈地險三關每荷戈
海內艾安輶傳緩獨將停策問巖阿

論墨絕句九首

宣和香劑用油煙奚李前撫竟逸然筆法而今論篆畫
江南三絕自當年

涉足塵埃世態生山林養節久方成論松略似觀人法

誰及新安戴彥衡

事見老學庵筆記

朝鮮舊國解燒松使者朝正數笏從著硯未能堅似石
卻無膠滯不妨濃

膠折燕山風莫勝篋中片片似春冰時工止解緣邊漆
不悟堅金儼故棱

除卻廷珪跨乃翁幾家絕藝後能同來男作相虞兒匠
何怪方今曹素功

霄漢樓憑江水空鶴峯書畫散秋風盛時猶記先人說

淚與殘丸滴硯中先君外家任大理公藏書畫甚富皆

墨奇品也大理先世鶴峯先生所蓄今有鶴峯

程君文筆工無比姿媚何嘗解俗書累壓篋中為長物

不妨啜汁賞心餘程魚門多藏程君房羅小華方于魯

墨其一也及明內龍香舊製名其齋曰三長物

我愛瑤田善論琴博聞思復好深湛才傳墨法五千杵

已失家財十萬金程瑤田語云墨以多杵為佳然自千

杵杵瑤田用古法杵至三千已極難而程君房必五千杵

年年兩袖染成烏佳字奇文一筆無惟向天涯寫歸興

故應銘背作思鱸范成大製墨事見老學庵筆記

祝芷塘編脩德麟接葉亭圖

人為碧海神山侶亭傍叢花醜石安異世定懷風景好

此生得倚玉枝難衣冠前輩名相繼琴奕中宵興未闌

昨日移居已陳迹就君時索畫圖看

鄭前邨以辰州守被議授員外郎

銅符分守楚雲開襍被今隨秋色迴閨閣臥時傳治績

江山行處助詩才為郎父老家安在作相公孫國又推

青瑣幾人憐故侶白頭相遇數銜栝

喬鷗邨鍾吳江邨圖

素產吳淞水春風未別家閉門深翠竹展席上飛花客
散看陰轉鶯哢到日斜匆匆將好景題咏在京華

翁學士 方綱 蘇米齋

宋賢遺故蹟乃在嶺南山海上流雲氣冥濛石壁閒披
榛逢節使墓石載舟還遠興高齋對猶令客動顏

送朱子穎 孝純 知泰安府

當日長安一布衣十年糠覈食猶肥遨遊誰識爲巴守
調笑何嘗入世機巒瘴盡穿江塞路嶽雲來欵洞天扉
東西踪迹君休論珍重平生志莫違

岷嶠東接泰山陽歷歷專城待俊良埽定蛛蝥將偃伯

登封鷄鯀欲來王禁中伏羲心偏壯劔外邈迴鬢已蒼
若會明堂陳治績豈忘沂汶古時狂

文筆人間劉海峯牢籠百代一時窮別來書到長安少
死去才令天下空傳說足疲登陟罷尙應舌在笑談雄
君懷師友頻郵置消息淮南幾次通

禹卿自入滇中路不見陵雲作賦才剖竹西南仍放浪
挂帆江漢竟歸來往年使酒同燕市九日悲歌上廢臺
此世論心常恨少至今相望各懷哉

冬至大風雪次日同錢籜石詹事程魚門吏部翁
覃谿錢辛楣兩學士曹習菴中允陸耳山刑部集

吳白華侍讀寓同賦得三字三十韻

侍讀城西住西望城上嵐雪明邀數客風定卽同驂嶺
照斜規掩林鐘晚韻緜聽詩情窈窕說士味醴醴燭盡
槌街鼓梧傾倒室壘昨朝寒太劇此歲日窮南氣抱虛
堂白聲搖空閱酣閉將同蟄螳臥欲作僵蠶絲仗從天
轉瓊膏灑地覃農田占穀麥齋殿映松栴圓陞

宵陪位

前衙曉放參

是日停朝賀

頻逢黨燎慶竊有負茲

慙

大祀鼎以疾未陪

雖替祠官職曾求國典語竹宮今日禮茨

屋異時談急景看如此遐思嘿有含堦知坏戶暖壤愛
滌塗甘酒幟懸風店漁蓑向凍潭靜尋封逕崦響聽打

窗庵茲意仍遲暮當前且樂湛醉歸曹適百病滿月幾
三重德吾嘗慕多材世所貪羣公高韻在游地奉陪堪
接臭皆幽蕙連根比灌藍敢援交吉禹終愈附音譚西
微蠻猶桀方隅澤待涵洪頤今向舉幕府正深探雉鵲
巢須埽蟬蛸股盡截雪霜更卒愍日月腐儒耽疏藿咸
逾量樽壘況盍簪因思王趙舊今夜宿巖岨謂琴德損之
飲鄭前邨寓舍觀其兩郎君新作文藝前邨本出
先伯之門追感往昔作此二首

君居空館一牀橫霽雪階除半尺明避世重來金馬日
向余久得石交情張鎧酒煖真歡伯擁袖詩寒覺瘦生

蕭瑟思鄉懷舊意當軒星轉北風聲

省垣羈宦迹相親再世論交況有神聞說伯高真可學
從游桑扈見長貧中年樂趣殊兒輩此日儒林少丈人
金玉欣看文價貴眼前過邁又超倫

元宵曹習菴中允家燕集

聲名座上逢前輩燈火堂中值令辰攜手故交皆好事
當頭新月最憐春太平不數神龍節鼓舞宜容蟻蝨臣
夜夜元宵吾未厭相逢誰似酒濡脣

演綸入都賦贈兼懷樞亭作江漢書院山長二首

昔別燕郊路今看艸又春還留三載客爲對再來人酒

態君都減詩懷家更貧匆匆頭竝白燈火一相親

君家昔全盛再相一經傳伯氏方遲出清名似古賢入
宮羣女日男子詣曹年悵惜風塵裏蕭疏江漢邊

寄葉書山十丈

側聞八十志猶長盡取遺經發憲章一卷豈容羣闕而
千秋何讓再升堂無人當代傳朱墨有願平生結老蒼
瞻望淮南真室邈衰哀燕北又春陽

葉劉年歲略相隨先伯同行又後之至貴不關天子爵
齊名起作眾人師青州邴鄭原同術林下瞻孚俟異時
四國傳公欣老健一家如我獨漣洏

情壯軍言集七
三
裕祭前一日齋宿官舍懷左一青時聞其罷官始
還

少年尙戀雞豚會將老寧追鴻鵠翔風閣聲搖情歷亂
春山雲接夢飛揚君歸白首無餘事江照青天送一航
燈火弟兄相見熱正余寒夜倒衣裳

雲南布政使王芥子入覲賦贈二首

維藩萬里護邊黎擁節三年祀碧雞艸綠閉關銅柱外
江喧行部鐵橋西蠻夷月出邀歌舞城郭風柔靜鼓聲
安遠最宜張祝枉莫嫌功伐奏璇題

繡衣持斧鎮潭州解帶賓筵值素秋密樹萬燈圍作伎

清湘千尺照迴舟歸艤鄂渚青楓晚移節滇南白日流
石廩祝融煙霧裏幾能散髮澹淹留

送弟訐赴杭州後一日行艸橋卻寄

汝猶爲客日吾亦未歸人復有山川隔寧同少小親疏
林夏下葉晚陌每揚塵欲得長懷弭彌如車轉輪

得朱子穎書

使君書札發齊州戰伐新經欲白頭出涕潺湲哀萬室
獨居威望鎮諸侯清秋念我狂尊酒落日同誰眺郡樓
海內幾人功力建腐儒端合任沈浮

惜抱軒詩集八

今體八十六首

雄縣咏周世宗

世宗北伐志猶勤山後寧容地剖分天意自畱耶律氏
人心俄變殿前軍五朝庶見真神武再世何難嗣守文
反覆興亡無處問瓦橋關外又斜曛

平原咏東方生

陛戟千官列衣冠九尺豪滑稽通強諫辭賦變離騷車
就公孫借家令少婦操惟羞齒編貝長對口無毛

去歲吾邑喪葉花南庶子今秋喪王懷坡吏部皆

文行爲後學之師又皆勳丈人行也道中念之追
愴竟日作一詩以寄海峯先生

吾邑平居三數賢十年風雨地相懸文章後死能無懼
日月東流逝每然滄海一筇憑嶽觀青山千嶂待江船
畢將宿艸銘幽墓止就先生臥短椽

漫興

故人揖我燕山前送我來過清汶川海右青山不可極
中原落日何茫然牛羊落落散高壠車馬驤驤誰少年
往來斯世卒無補俯愧古人青簡編

朱無逸孝廉自平陰來會賦贈

自夔名山一杖筇敢言老子迹猶龍布帆垂拂淮南樹
芒屨來登日觀峯雲海似於人有約冰天豈意客相從
憑君欲問平生業倚聽寒巖夜壑鐘

題子穎所作登日觀圖

窮臘陰凌蔽暮曛高巖孤迹此偕君前生定結名山諾
到死羞爲封禪文豈有神靈通默禱偶逢晴霽漫懷欣
卻從元旦官齋靜看埽滄洲萬里雲

次韻子穎送別三首

盤盤泰山石終古不相離石上雲如蓋青天多路岐浮
雲將客去盤石此心知諒守平生諒寧無後見期

海月依巖上官齋記客來登樓一俯仰窺牖其裊裊
引千峯氣心思萬古才爲畱三百字長對碧雲開
白髮遲聞道青山且縱狂江風清一曲樹日蔽千章古
哲惟文字天心豈喪亾當憂商訂少暇日一東望

乙未春出都畱別同館諸君

同承 天詔發遺編對案常餐少府錢海內文章皆
輻湊坐中人物似珠聯三春紅藥黨衣上兩度槐黃落
硯前歸向漁樵談盛事平生奉教得羣賢

汶上舟中

春風迎我自江淮岸柳將陰花漸開盡室相看浮汶去
數山如畫入船來微波夕照融當面飛鳥長空近好懷
欲上濟樓呼李白月澄滄海玉爲栒

江行絕句

天低兩岸直風緩夾江灣樅陽猶未到已見皖公山

夏日

空庭朝復暮邈爾若無依自願與人遠方知近道稀暑
雲檐外盡晚日竹中微谷鳥翩翩影孤翔識所歸

夏夜

舊讀殘書向几橫新陰鄰木隔牆生檐風艸閣方孤坐
雲月蕉窗度二更擾攘蟲豸無一影纏絲絡緯有餘聲

謳吟自覺偷閒優那比前賢挾勝情

曉齋有述

盡舍人閒事將求達者機開軒垂艸露曉日潤煙霏梧
竹清千尺雲峯碧四圍不知滄海內此志孰相依

泥汊阻風

泥汊絕岸菰蘆風吹逐白雲如轉蓬兀茲小舟未可下
杳然壘嶂何當通一夜寒谿間落木萬里長江同拍空
懷抱須向碧天盡起借漁郎沽酒筒

宿攝山寺

巖風洗霧出芙蓉含冷流哀越幾重拄杖曙雲驚鳥宿

古碑秋雨讀苔封交流急澗鳴千步極北憑江更一峯
誰識風濤鄰咫尺不妨幽壑自從容

出金陵畱示故舊

又向青谿十日畱依然雙闕望牛頭交游聚處思移宅
衰病行時愛棹舟蕭寺風多長似雨後湖煙澹總如秋
摩揩老眼僧書內不爲興亾作淚流

竹林寺懷王禹卿

盤磴上香臺雙峯倚檻開江流天影盡海氣地陰來左
右皆松響蕭條獨客回他時君到此空復憶衰衰

招隱寺

竹林層檻閣江水照晴空杖策來招隱巖松與澗風鳥
聲含雨細樵徑隔雲通優恐鳴泉曲彈琴值戴公

江行

夜宿蕭然伴釣翁曉乘涼月出蘆中縱橫島嶼中流失
繚繞雲煙萬里空燕尾水分斜渚岸魚鱗波颭夕陽風
散人隨意江南北處處青山戶牖同

同禹卿拙齋登木末樓

江邊携酒送春歸霽雨登樓風滿衣賈舶霾雲吹暗浪
佛圖懸日照空磯故交縱蕩情忘老寒衲逢迎語亦稀
第一江山容易到舉梧猶欲盡斜暉

惠照寺或言古木蘭院也見禹卿於此寫維摩詰

經

落盡淮南萬樹紅晝陰僧院鳥玲瓏檐含梅子黃時雨
戶進新篁綠處風出世了無香海界置身休在碧紗籠
鐘堂一飯成遺迹回首天花丈室空

雨後

晝陰沈地一花明裂紙窗前素卷橫展讀未終雷雨適
竹軒梧閣作秋聲

江上送吳殿麟定還歛

我行江北路漫漫送爾江南山萬盤青天落日如相憶

夏倚蓮花峯上看

題二王帖

自斷平生誓墓餘會稽東去世情疏無端卻念虞安吉
不似田閒種菓書

偶有所感書此自
嘲勿謂譏右軍也

寫付官奴論一通千秋俯首有涪翁自憐無力收遺本
梁帝何嘗擅折衷

古人已與不傳亾優劣誰堪品二王地下右軍如可作
詎將知已許文皇

餘杭甥作桓家婦妙蹟從汗寒具油忠義有靈應不忿
幾能藏弄託清流

太白樓

太白樓頭空復空滄洲晴照碧流東久傷白髮生明鏡
每見青山憶謝公萬壑鬣松鳴水上九秋霜鶻入雲中
不妨無客間高詠自有江山興未窮

燕子磯

裊裊丹崖挂薜蘿石亭松檜俯驚波蒲帆從此通滄海
藜杖曾攜眺曲阿舟楫客逢前日少江山秋見夕陽多
水雲洲渚還相錯獨鴈流哀柰遠何

寄王禹卿

竟日無人至蕭蕭風雨涼樓臺憑晚霽天地正青蒼思

爾西湖去拏舟春艸長無因聞玉笛煙月夜琅琅

荅客

鳳城恩近賁新除鴻漸都升省閣居楚國多聞推左史
漢臣清望動中書春深文譙盈金谷日宴儒林論石渠
盛世彈冠誠欲往祇憐衰髮不勝梳

懷朱竹君

學士文章三十年清修難弟亦稱賢百令節似郊祁詘
何必才爲絳灌憐世態期期求復古酒懷浩浩欲登仙
一時門下稱英少誰是侯芭受太元

懷陳伯思

壯年車馬劇馳奔晚節疏慵日閉門奉粟幾時能飽朔
合尊何處更畱髡室中婢老都無齒竈下奴清不如輩
料得涼宵風雨急誦詩流涕卽令原

涼階

涼階今夕又飛螢倚檻風前已涕零人迹不如修竹影
每隨明月到中庭

題僧照

少通輕俠老如冰禁足蒲團學小乘閒說秣陵前日事
只疑元是六朝僧

鮑鸞書自歛渡江問業於蒙陋媿其意贈以詩

我如山徑斲行軒擁腫枝柯大樹存節目何由能待問
青黃久已謝爲樽披榛客自非流俗岐路誰當見道原
共對小庭芳艸積林風吹晚更無言

敬敷書院值雪

空庭殘雪尙飄蕭時有栖雅語寂寥久坐不知身世處
起登高閣見江湖

霄漢樓

三十年前登此樓招攜綠鬢賦滄洲四山雜樹排檐入
萬里清江抱郡流過眼雲煙窺物外凭欄花鳥又枝頭
層軒尙有斜陽白更就明霞望逝鷗

春日漫興

春冷江城裏端居到日斜閉門生逕艸空砌墮鄰花亂
帙從行鼠分殮與聚鴉千生彈指過何處惜年華

芳艸深春後高樓擁樹端一城萋更綠累日未曾看江
氣浮煙薄山光抱郡寒故人猶辱問數字自長安

春動彭蠡鴈蕭蕭正北飛長空照江水孤影與斜暉託
處吾將老平生侶更稀一聲當檻外舉首忽沾衣

絃月藏雲氣幽庭自夜明樹疏懸烏宿花密照人行書
冊催兒誦衣囊檢婦情人閒紛感觸何遽見無生

又絕句

新蕉才展中心綠
芳杏將殘半樹紅
門掩小庭無客到
呼兒相對立春風

几榻塵生坐不知
一燈深夜照書帷
江邊春盡瀟瀟雨
空館花開又落時

自詠

羣賢鼓舞赴明廷
陋巷無車戶久扃
已作元龍牀下士
每書子玉座旁銘
故交四海多衰白
何事千秋託汗青
風雪繞窗燈火暗
更披朱墨讀遺經

聞河決張瑞書以陝汝道督工沒焉愴悼作詩

歲賦長焚築水壩
又聞萬室入波衝
王尊勇竟爲冥死

趙孟儕還謝禹庸祠廟吏民垂淚過衣冠
先壘想魂從
衰罷媿乏當時用
焉敢薰膏議楚龔

細雨

細雨餘春尙薄寒
綠窗風定蕙香殘
七年同種階前樹
獨坐花開掩淚看

畱客

高齋西面向澄江
緩酌蘭陵春酒缸
莫厭坐深風露重
宵分圓月始盈窗

寄子穎禹卿

拔地凌江峙碧峯
水雲禪榻此相從
解衣蘿薜巖前石

倚被梅檀閣外鐘三客竝知非一世兩山迴望有餘蹤
太虛爲室時相見豈爲離憂日置宵

銷暑

古木陰能大空牆日亦幽風絲垂縵女雨蔓長牽牛尙
友誠多遜離人庶寡羞暑窗深竹韻危坐與神謀

不寐聞江聲

憶昔乘舟徧遠征和風惡浪每殊情同舟死喪身今老
欹枕江聲入皖城

夏日絕句二首

數株當戶綠交加徙倚前榮見早霞忽有宿禽驚起語

露梢飛落石榴花

牆頭高樹綠雲天謝盡餘花未噪蟬掩卷看陰移午後
數聲唳鳥在風前

夏夜

黃昏急雨夜中收起見華雲吐玉鉤久立玲瓏階下影
樹梢風過已鳴秋

穀樹

牆西生穀兩株連陰蔽斜陽媚夕煙惡木豈能妨志士
吾廬何厭聒繁蟬窗閒細響鳴秋籟屋角新光照上絃
幸假不才居隙地清風時爲至江天

感秋

秋艸萋萋蘆荻花涼風嫋嫋大江涯
雨餘墜棗兼黃葉日落歸禽背絳霞
俯仰羣生同逆旅棲遲百里亦離家
舖糟晚欲從漁父倚待亭皋立柱斜

題畫梅

老夫對客常思臥誰寫疏枝劇可憐
渾憶揚州喚吹笛梅花嶺上值新年

魚門編修曩以一詩送僕南歸今失其橐
更向僕鈔取因併一詩寄之

六藝高論玉塵揮百家楊秉莫能非
欣登雲閣仍簪筆

卻送春艸憶釣磯再應徵書丞相老三
爲祭酒大夫稀聖朝舉欲畱儒者豈得
歸田志不違

寄朱二亭

念君里舍會絲簧獨屏吟詩兩鬢蒼
閉戶不知誰與語向人自謂我非狂
居惟甕牖仍耽酒行過旗亭就賣漿
送我橫江歸艇疾蜀岡西望幾斜陽

臨江寺塔

江上浮屠三十尋半登迴首見楓林
夕陽忽送孤鴻出暝色將生百雉陰
浩浩東流浮積氣茫茫後死獨傷心
西風飄蕩蒹葭外止有滄浪漁父吟

寄任幼直

昔開金匱集羣賢花藥春風坐榻連藏史著書歸苦縣
祠官侍禮在甘泉羈閑繫馬階前地悵望飛鴻樹杪天
豈必知音當代少眾中時一鼓琴絃

寄孔撫約

岱山樅檜鬱嗟我礪戶秋風吹女蘿早厭雕蟲卑入室
遲歸金馬且繁阿萌芽頗歎言詩少枝葉惟嫌擬易多
千古著書非近用廟堂伊鬱獨絃歌

聞禹卿以書名上達幾戛出山而竟止因寄

王氏風流艸隸兼江東行樂且遲淹解官誓苦歸元早

合妓情多聽不願家作道民輸斗米身惟服食乞戎鹽
練裘團扇名皆貴豈必凌高署殿檐

哭魚門

魚門素有同居之約今春聞其引疾方為
欣然而魚門旋以訪畢中丞于秦沒矣子

幼才三
歲耳

遇君通籍已華顛猶見雄才賦百篇送別議聯元亮井
論文曾許伯牙絃十年白虎成通論幾日揚烏與太元
一入峭面身不返空聞解紱買江船

論書絕句

羣展風流貴六朝也由結習未全銷古今習氣除教盡
別有神龍戲絳霄

筆端神動有天隨迅速淹畱兩未知莫道匆匆真不暇
苦將矜意作張芝

雄才或避古人鋒真脉相傳便繼蹤太僕文章宗伯字
正如得髓自南宗

論書莫取形模似教外傳方作祖師老去差當捫鼻孔
世南臂痛廢書時

本是嶽奇可笑人衰羸今況髮如銀薑芽斂處成何狀
正得嚴家餓隸倫

哭孔撝約三十二韻

孔夢興疇昔斯文失在茲世從乖大義家尚誦聞詩舊

德誠遙矣通家願附之壁中書若授坐上客何辭往歲

南宮直東征使節持鹿鳴君始賦駿骨竊先知庾信升

朝歲揚雄好賦時翰林真不忝家法亦胡虧文富韓陵

石書摹鄒嶧碑談經工折角好學復深思海宇承無事

宮庭大有爲九流讐祕省三俊接彤墀博誦先王語當

求孔氏師二劉今幾見後鄭獨勤儀

君作儀鄭堂嘗乞余爲記

老氏

藏書室儒林習禮帷廟堂君竟返延閣士奚資道德慙

途說文章劣管窺燕居頻接邾狂論每無疑處處同栢

酒殷殷愛履綦逮聞舜禁闈先已病茅茨岱嶽分天峻

江流控地卑龜陰人去少舒口鴈來遲鵬鳥妖斜日龍

德誠遙矣通家願附之壁中書若授坐上客何辭往歲
南宮直東征使節持鹿鳴君始賦駿骨竊先知庾信升

朝歲揚雄好賦時翰林真不忝家法亦胡虧文富韓陵

石書摹鄒嶧碑談經工折角好學復深思海宇承無事

宮庭大有爲九流讐祕省三俊接彤墀博誦先王語當

求孔氏師二劉今幾見後鄭獨勤儀

君作儀鄭堂嘗乞余爲記

老氏

藏書室儒林習禮帷廟堂君竟返延閣士奚資道德慙

途說文章劣管窺燕居頻接剏狂論每無疑處處同栝

酒殷殷愛履綦逮聞舜禁闈先已病茅茨岱嶽分天峻

江流控地卑龜陰人去少舒口鴈來遲鵬鳥妖斜日龍

蛇在歲支風流前日會天意百年期橘幼靈均頌蘭摧
長史悲豈教爲異物真見瘞瓊枝銘鼎幾先德沾袍辨
異辭君書來云近喜公羊學方爲之說未竟書成寧餅肆身泯罷膾斯適
就潛夫論希聞智者規九原終不達一卷更投誰余以經說
寄君甫去計不及見鬢髮秋增白雙髦昔對垂止餘名篆在啟篋
涕交頤

寄釋誦茗

瓶鉢相逢慧業兼碧雲詩法授江淹離居一夕身衰白
禪悅多時味屬慳陶令社容耽枕麩周生室久謝無鹽
卻思半日山光寺共聽風鈴語塔檐

答孫補山中丞過港口萬年庵見懷二首

嶺嶠頻褰問俗惟流歛夾道擁蠻夷建牙巨海重雲上
弭節千山落日時明月珠崖盈近岸祥飈神廟送歸旗
縣聞諸管環相慰久識中朝吳隱之
湘東松竹帶郵亭十五年前兩使星鴻翼久迴春水白
隼旟重向越山青僧堂吟就興遙夢麟閣圖成失壯形
我欲更除三宿戀就公新治乞壇經

聞香茝兄擢廣東按察使卻寄二十韻

舊德前朝在傳家後起難江山畱治迹祠廟足辛酸兄
仕初爲令君恩每改官分符臨夏口建節過閩灘

荒服南溟闊雄藩列嶂巒

命提中典使首立外臺

端經術良爲本科條亦可觀霜風清瘴癘蛟鱗伏波瀾
陳氏嘗慙長諸袁實繼安公卿終可致道德在無刊永
憶家風厚咨嗟獄吏殘深文堪惕息考讞極創瘕昔濫
京倉祿晨趨省戶丹循書黃案尾默媿惠文冠隱几今
懷耿中宵每竊歎政茲褒召杜道必閉申韓陳臬雖無
陂推情或未殫勿憂陳奏卻翻戒慮囚寬梅嶺延冬燠
茆檐臥歲闌公私相望切引領屬加餐

詠史

將軍猶駐碧油幢積石河源未盡降安定有城名第一

隴西出將每無雙牧民豈謂非良幹伐畔何教震友邦
憶昔盟書金似粟百年金鼓不聞攄

荅客

藜藿麤營便閉關幾看榮謝隔谿山淹畱正爾因衰病
敢笑何公去復還

大觀亭

中丞祠倚石厓青杖策秋風更一經舉目衰林如脫髮
幾人采鞠制殯齡清江三面舒州郭南嶽千峯皖口亭
落照橫天鴻鴈起獨憑長嘯對冥冥

黃慎雨景

數椽深壑架茅茨亂木霾雲出谷遲忽聽後巖飛瀑急
四山風雨已多時

李敦庸荷葉雙鳧

落盡芙蓉葉未枯野塘深處唼雙鳧貌來合乞忘機侶
曾入煙波得見無

謝陳勤齋方伯餽紙

已震戎韜靖阻遐又瞻弭節澤天涯游思竹素真餘事
分乞谿藤賁物華身媿詞人居楚國腕嫌餓隸出嚴家
安能泚筆形周翰會見褒書降艸麻

懷故學士朱竹君

洛下書生起侍朝獨陵天地氣飄飄青雲後進時來附
白髮前交意每饒中夜酒多猶擁榼過春花少尙連鏹
卻臨杖節經游地立望江亭晚落潮

懷故編修程魚門

走昔雕蟲志尙勤十年操牘每從君承吟雌霓知聲病
荷定雞人潤小文白下退將鄰舍卜玉堂晚逐少年羣
世閒一別逢無日間有遺孤未展袞

唐伯虎墨筆牡丹

兩枝芳蘂出深叢休比徐熙落墨工曾向金陵參法眼
了知花是去年紅

借抱軒詩集八
離思

畫角一聲江郭布帆幾疊風亭前日故人千里倚樓依
舊山青

借抱軒詩集九

今體一百十首

寄天柱山人

天柱萬重雲雲中抗棟棼巖花稀見客松蔭獨隨君沈
手劬行字琴心內景文坐忘如著論須與謫仙聞

八龍眠

策杖向山碧心清境亦幽樹陰藏雨漬花落信風柔鳥
迹交深逕人家面曲流寧當容竝舍終歲託夷猶

江路感舊

山藏春穀堞岸折石城船白髮尋前路青春似往年落

花江館雨叢樹縣樓煙未逮忘情者臨風故黯然

野戍

野戍孤無障停舟此作鄰連朝江路冷數點岸花春白
霧離邨樹青蕪向渡人無從商去住試禱水祠神

江路又一首

無復平生侶重於故迹經春風吹短髮江路數長亭帆
遠橫天白山多跨地青寂寥仍獨往風浪接滄溟

寄靈谷僧

自昔居靈谷終年聽石湍落花趺坐軟深樹衲衣寒孤
月曾前指千山定後看無緣居士室暫接問輕安

漫游

東風吹脫鬢毛斑舉世誰如老子頑欲抱龜著終蜀肆
豈將詞賦動江關五夏竹露聽蕭寺一逕松風入蔣山
越客偶談天姥勝相逢倚杖夕陽閒

謝簡齋惠天台僧所餉黃精

衰年不願海山居願舐淮南藥鼎餘但使體中還少壯
更偕兒輩向詩書蒼山旨蓄承分乞白首飛蓬或埽除
想見赤城霞畔路長鑿木柄下空虛

輓陳勤齋中丞

西南地控五谿遐承詔單車往建牙出令蠻夷方企踵

從行琴鶴政忘家山圍幕府秋迴鴈霜落旌門曉聚雅
故宅但瞻雙戟在迎歸白旒拂江花

陶怡雲深柳讀書堂圖

我如枯樹託婆娑夢見新條發舊柯往日讀書真恨少
少年如子豈能多風軒百尺搖陰翳雲幌千秋對嘯歌
願得隔窗斜倚聽立深飛絮覆堦莎

王孔翔香雪梅宴集圖

渡江春盡冬初去風雪寒山獨閉門羨殺烏衣眾年少
梅花時節又開樽

讀書秋樹根圖

秋容自老君方少昕夕披尋歲月長不識五車書就日
卻須林葉幾番黃

孔信夫舍人自揚州挈舟見訪將自此適蘇州章
淮樹觀察邀與其觀家伎因作此送信夫

櫻筍成時燕入堂當軒陰重艸初長共扶白髮三千丈
來看金釵十二行灑座玉船傾若下指塗蒲席向吳閭
明朝萍迹都成憶耳識仍增記繞梁

題右軍帖

蘭亭眾會獨傷懷先墓歸誠誓更哀顯授何嘗較懷祖
扶生或竟遂方回峩眉汶汶領終難至青李來禽尙可栽

我亦年今垂耳順千秋思若坐中來

雨夜

秋館蟲吟出艸根倚窗塵榻一燈昏
蕭蕭半夜龍江雨知有寒潮又到門

簡齋年七十五腹疾累月自憂不救邀作豫輓詩
龍飛四載一詞臣吟嘯江山五十春
莫怪尊前爲了語當年同輩久無人

一代文章作滿家爭求珠玉散天涯
替人未得公須住天上寧無蔡少霞

宮闕前朝迹惘然隨園花竹獨清妍
故墟憑弔終難免

且願從游叟數年

氣聚升爲五色霓倏然散與太虛齊
海山兜率猶黏著那叟投生向玉谿

作書戲題

遂良舊日鬚皆白祕監今年臂叟衰
結習欲除猶未盡前身或是永禪師

哭孔信夫次去歲觀伎韻君自遺書乞余銘墓

公子聲高魯廟堂爲余江水遡游長
石銘歸託名千載玉版前雷墨數行
鵬臆恍知從物化人情未可扣天閭
清樽急管同聽處依舊烏衣上玳梁

幼子師古觀之因賦

鍾離真主渡江前雙桂蜷枝已刺天南國市朝非曩日
西風闌檻又經年黃金萬葢香浮閣白雪千莖冷覆磚
零落滿堦君勿歎吾生那得較花堅

漫游

青嶂連江抱隔闌此閒容託葛天民垂金花落秋將老
流汞光升月又新隱几無心從喪我登山有句偶驚人
每攜邛竹尋蓬藿容有齊梁迹未湮

登清涼山翠微亭下重八隱仙庵看桂偕浦柳愚
山長毛侯園倪健堂兩學博

亭高碧嶂秋風上帆出青天曉日時一攬橫江全楚勢
再尋幽壑小山枝樓前影擢交龍起雲裏香薰駐鶴知
賴接數君情不淺不妨繞樹坐頻移

次韻同年蔣澄川見懷澄川去夏皖中貽詩今夏
始達

江北江南兩岫雲從風偶聚又披紛鋤犁久分終南畝
隴隧今傳誓右軍難得經年通尺素況期千里合離羣
相望都似秋林葉澹倚寒山挂夕曛

毛侯園用僕看桂前字韻作詩見貽因復荅之

萬里清江到坐前又逢佳客九秋天短筇共散幽憂疾

芳樹誰知偃蹇年君輩論文推馬齒世閒相士貴鳶肩
止宐不負看花約自斲平生志已堅

問張荷塘疾

君抱幽憂卻酒卮空堂視蔭每同誰今年青女慵司令
九日黃花未吐枝欲起毗耶居士疾愧無天寶謫仙詞
瓦棺閣外江天遠請眺餘霞落鴈時

喜胡冠海至

高樹寒陰落掩扉城頭鍾阜夕煙微青楓江上人才返
黃菊花初蟹欲肥行樂繫錢隨處好論詩燒燭隔年違
黑頭那易身無事且爲頻來趁短暉

天門

艸綠濡須口天青博望門雲山開四面波浪急東奔地
有千秋感人傷垂老魂頻年逐帆影幾處認潮痕

題畫

橫風吹雨過林邱萬片飛雲作水流倚檻數峯藏又見
渾如天際識歸舟
千巖雲起壓林低黃葉聲涼送馬蹄雨急看山行更緩
野人家止隔前谿

觀明賢在楚宗室宅詠繡毬花詩卷郭美命首唱
凡十九人王夢樓跋尾有評繡毬花詩以宋牧仲

爲冠語因題其後

往日東風帝子家
濡毫上客寫妍華
時乖竟值憂危議
春盡難畱錦繡花
節概青編悲志士
文章白髮笑生涯
從游紫栢猶吾願
綺語何煩甲乙加

荅朱石君中丞次韻

衰年蒼荀甫聞香
那得全將六用藏
縱有隨之推老馬
其如後者未鞭羊
使君膏物真時雨
故侶零柯怨早霜
不貴藥珠傳不死
諒公宇定自天光

天界寺閣遇兩蜀僧

南朝宮闕悉榛荆
尚有梅檀閣未傾
坐看青山圍建業

來從赤腳下桐城
殘英偶爾餘春色
布穀泠然早夏聲
萬里我眉僧接鄰
小窗深潑夕陽明

送方坳堂解官後將之上江

鎖闥將闢始聞名
夢過春秋二十更
三省最遲麾出抱
九州獨許蓋先傾
山當蕭寺時停騎
身付扁舟欲濯纓
我亦舉頭偕眾望
謝公終起爲蒼生

君與名山宿有期
那應長閉入車帷
好乘霄腳年來健
徧攬煙霞物外奇
僧俗總隨雲水宿
漁樵或與姓名知
故當飽歷人間路
歸見桃花一笑時

重宿幽棲寺

南山東面最孤騫，拄杖時攀問法源。
紺宇中臨千嶂小，黃梅秀出一枝尊。
春階雨歇纔懸榻，夏院陰成又扣門。
深洞了無來去迹，只餘石溜滴苔痕。

陳東浦方伯招飲瞻園次韻

前代英雄不可尋，千秋臺榭傲憑襟。
欹松立石冷風度，暗艸叢花夕照深。
官閣畱傳多故實，謝公寢處愜山林。
酒闌倚檻容吟嘯，無那高垣易夕陰。

次韻荅吳竹橋

稱病君真似長卿，我如蒲柳老無榮。
文章已謝當時好，止足寧希史傳名。
獨立懷人常企踵，相逢狂論復盱衡。

清詩冷若臨風笛，吹徹秦淮秋氣生。

題吳竹橋湖田書屋圖

中田有精舍，挾冊青林閒。
起見海東月，流光湖上山。
時聞漁者唱，或值耦耕閒。
非得忘機侶，悠然自掩關。
昔君辭省閣，余亦臥江濱。
山渌垂湖岸，宐容澹蕩人。
藏書多足老，資物少無貧。
更欲刺舟往，相從忘主賓。

題黟縣朱榮朝望嶽樓圖

記託新安郡，晨朝見異峯。
遙思黃葉逕，多被白雲封。
孤往未能決，他年焉可逢。
披圖如曩昔，惆悵列巖松。

題李僊枝四友圖

惜抱軒詩集九
九
君築巖居積翠重飄然偶出似雲龍孤舟乘興行千里
襍被吟詩入萬峯屢痛昔賢披墓艸自希良友結霜松
歸休梅竹蕭疏裏風雪余將策杖從

方坳堂觀瀑圖

泰山北面寒巖谷曾逐谿聲就朗公莫道出山泉竟去
舉頭長在碧雲中

坳堂觀察自安徽返將歸濟南仍入都補官餞之

於清涼山

天門赤岸涉波濤問訊秋來迹已勞風雨才晴將送遠
江山無際共登高重來郭伋誰能必獨立王尊氣自豪

衰眼摩揩瞻事業何妨萬里縱旌旄

題坳堂所藏諸城劉文正公手蹟

獨立清修動主知喟然耆艾在彤墀後來董令思文
偉誰許王宏繼穆之竹素蒼茫千載事邱山零落百年
期寸縑中有平生感會共山公把酒卮

跋汪稼門提刑登岱詩刻

昔乘積雪被青山曾入天門縹緲閒日觀滄溟猶在眼
白頭明鏡久驚顏壯才許國朝天近名嶽裁詩擁傳還
盛藻宜標千仞上衰翁無力更追攀

過蕪湖

不見春江際安知路所經遠隨煙外席時逗岸邊亭鵲
尾雲彌白鳩茲山漸青戛投前港宿雨勢復冥冥

四合山阻風

柳枝搖不息久立望空津帆勢遙投戍濤聲故近人雲
光開岸晚艸色澹谿春安得知言者披襟志一申

天門阻風

亂山蟠野合雙嶂矗雲開地擁江聲出天橫雨勢來輕
蓑漁故往挑菜市都回老子惟高枕東西任擊厯

東梁山僧舍

津濤行復滯峽嶂路還緣石壁凌江閣風林隔浦舫鷓

盤嵯樹側狔出浪花巔往迹無儔伴春陰彌悄然

復阻風

三月鶯花盡江邨直似秋陰從亭午合風挾暮潮畱水
氣侵厓上寒聲在樹頭長年仍益纜水宿亮多憂

烏江阻風

金陵如咫尺牛首在船窗棹往彌求速波來未可降急
風吹白雨薄暮泊烏江燈火連檣底瀟瀟雜語龐

楊龍友墨蘭竹

秣陵春盡倍銷魂紅藥花殘綠萼存被惱更尋修竹逕
千叢元是畫時孫

江左風流染翰時越疆同裏故人口風蘭露竹容相憶

寒食會無上冢兒龍友殉難時吾鄉孫武功監軍與之同死後監軍子收其骨併龍友合葬

桐城北楓香嶺
余嘗至其墓側

為周期才題春江歸棹圖

如織江帆上下流無人天際識歸舟昨來停棹還西去

畫裏昇州似鄂州

陳約堂武陵汎舟圖

曠懷無染俗情濃芳樹春流到處逢喚作武陵何不可

桃源元止在君胷

憶禹鄉在南昌

我憶人閒王禹卿休心總異少年情青娥玉笛春風盡

朱雀金花夜氣生揮塵僂應通肇論折釵偶或作顏行

洪州止為西山戀僂滯南來累月程

游攝山宿綠雲菴二首

不見深巖桂微風谷口香披雲過石徑聽澗到僧房穹

壁天容峻環林地籟長欲求明處士偃蹇待斜陽

叢樹未搖落寒山已改容自攜孤杖影晚下最高峯燭

隱秋聲閣詩成夜壑鐘白頭餘健在幽處欲潛蹤

最高峯登眺

已上嵯嶢又佛臺正逢秋霽夕陽開地窮江海與天際

山自岷嶓夾水來南國中原同下頰華林衰艸幾千回
何當住此雲霄上長與星房日馭陪

題汪君試硯齋圖

涵空高蔭氣清泠黝玉開函發古馨蕉葉滿窗苔滿逕
倚楹研綠寫黃庭

題畫

山遠雲九澹江空影最長秣陵秋易到不獨爲林霜

瓦棺寺

招提地亦古長干圍入南城體勢殘穿逕石崗隨繚曲
到門風葉颯清寒虎頭無影存金粟馬鬣何年出瓦棺

尚有里民矜故事一成臺上集文翰

前有小阜民謂卽
鳳皇臺側建鳳游

翠微亭

蘭若門中山逕清攀躋幾折與雲平排空疊嶂穿城入
鋪地橫江隔樹明天運九秋如有怨人思萬古到無生
奇文腐艸要同盡何用登高作賦名

埽葉樓

碧雲垂下大江流坐倚江城古石頭丹嶂欲平猶作巘
青楓未落已成秋三山夕照新林渚萬里西風埽葉樓
虎踞地形猶在眼清涼深院發鳴虬

陳碩士藏管夫人寒林小幅

獨於疏澹著精神山遠林枯意倍真借問倪迂嗣誰法
右軍書學衛夫人

癸丑重九無樽酒之會往問袁香亭同年亦獨居
寂然乃邀登雨花臺臨眺至暮香亭有詩和之二

首

六朝建國猶形勝九日登臺思悄然故壘蕭疏黃菊節
旅懷搖落白頭年秋聲城郭千家樹返照雲霞萬里天
若對江關悲作賦不如山石解談禪

君解銅符五六年逢余黃髮白門前彈冠舊侶真無幾

策杖清郊尚有緣俯踞小亭衰艸地仰思高座雨花天
兩翁自變尋荒迹豈必龍山會眾賢

婺源胡奎若藏黃石齋自書五言詩蹟題後

直言瀕死荷戈餘社稷猶思再掃除指佞朝廷惟汲黯
存亾時勢異申胥秋來艸沒宮門路

石齋將死于江寧時過故宮門猶下

車見裕夜半鐙寒屋漏書要識艱危成節概不隨流俗
郵記在平居

和袁香亭在鄭思贊孝廉宅看牡丹

三月江城泛玉卮朋簪不異少年時露華朝暖春應駐
幽檻風微日漸移興極捲幃看國色病餘擁毳作僧詩

惟君彩筆猶豪健合有紅雲捧硯池

和袁香亭清話

白頭老子尚婆娑未便空山考在阿紅藥堦前春事減
沙棠舟上酒情多衣沾天女花難去隙閱奔駒影易過
試就詩人乞禪悅右丞容卽古維摩

朱白泉觀察以僕往昔訪其先公運使於泰安時
所作詩文各一首同裝成卷見示感題

平生交友接龍門霽雪高山共酒尊立處不知天下小
坐中祇謂古人存文章海內叻知已旄節江東見後昆
畱得白頭如夢過舊書重展落嗁痕

贈釋妙德嘗作老子疏者

上人杭越秀攜笠到江邊宴坐苔生地談空花雨天道
場隨里舍法性寄詩篇了悟無人相何妨解又元

過明孝陵

蔣侯山與故宮連想見興王作邑年銀海竟從僧易地
石牀空令女朝天山青尙似觚棱闕澗涸曾無功德泉
正是江邨寒食節落花飛絮羨門前

見諸君作莫愁湖櫂歌戲擬四首

繁華才過卽千春遺迹荒寒任水濱復送酒船歌板至
那知中有斷腸人

惜梅軒詩集卷九
春光易盡是湖涯桃李陰成柳作花和雨和煙千萬樹
不知誰是莫愁家

游人散盡漸烏棲惟有漁舟半隱堤一曲櫂歌明月上
淒清風露女牆西

前古煙波後世樓教人歡喜耐人愁新詞才子情深淺
付與雙鬟試轉喉

游瞻園和香亭同年兼呈東浦方伯及在坐諸君

八首

自有丹陽郡何時不勝遊名園今日會官閣累朝畱古
意蟠松正天成立石稠遠思營建力名字向誰求

開第從徐氏元功得賞延飛龍天子去喬木世臣傳室
榻神疑在山亭迹邈然時將青簡事回憶綠尊前

儒者資爲政維藩見節旄阜居憑井邑清氣擁林皋暇
日聊陳醺臨風一染毫石梯摹蜀道往迹念仍勞

高軒開夏氣幽檻剩春花蘿翠升還墜松聲壯不譁褰
衣穿數曲當席眺千家未覺淹畱久江天送落霞

山遠良難步江空遽易臨無如三畝近不厭四時吟苔
藉幽人履風披牧伯襟寧如羊叔子感慨畏幽沈

諸君羅俊藻野客與追陪地下魚爭出天邊鶴亦來朱
顏今已過笑口古難開豈恤狂言發頻當覆酒杯

畫手有袁張同時并擅場筵前交履烏海內各文章雅
集圖如就裁詩墨盡香祇憐才盡者偏畏擘牋長
夙願鍾陵下茅茨架薜蘿卜鄰人有幾小築計云何地
異官齋閔朋隨風雨過者英真可會山似洛陽多

送李嗇生歸揚州後卻寄

論交談藝氣飛揚清夜纔邀共舉觴楓葉江天舟檝杳
桂華樓榭雨風涼悲傷短髮秋三月淪落高才水一方
計日賁來還有約糞除東序布藜床

懷祝芷塘

聞住華亭四五年東風輒爲望江船料應玉貌今衰醜

卻誦清詩轉妙妍地上朋儕餘有幾天涯風雨颯無邊
白頭垂憶平生事更寄傷情到海壖

江南榜發同居諸友多被落感歎成咏

九日明朝至千山秋氣來江南悲送客雨際罷登臺旅
館須耽醉風帆且緩開誰憐黃菊節多滯白衣才

有懷稚君

秋陰不成雨黯黯望空津楓落初寒水帆行失意人山
林遶遠性書筴逐羈身安得將尊酒相邀慰此辰

毛侯園倩樸山道人設素食於隱仙庵見邀同袁
簡齋浦柳愚金麓邨陶讓舟王栢岬馬雨畊門人

朱珏同游其時桂花甫謝率咏一首

野蔌烹香進舊醅
鶴儀道士住蓬萊
青山曲曲藏修竹
紅葉莖莖映碧苔
孔蓋蔽空雙立桂
龍畧偃地半枯梅
清風又引羣賢會
何必花時逐眾來

別治三

日月雙輪邁文章
一管窺劣容畱後死
敢謂使先知
求子才寧易從余志
亦奇深山有神會
何異接披帷
秣陵城外水空遠
動離心楚澤同津去
歸艇隔浦深秋
風吹短日江霧蔽
長林孤唱中流發
寥寥無賞音

洲上見桃花

荻芽初出麥莖寒
中有江桃作意丹
開落年年天不管
夕陽洲上獨來看

祝袁簡齋八十壽時方送小郎就婚湖州

春風鳩杖挈佳兒
棗栗盛筭共壽卮
樂事天教今世獨
才名人作昔賢疑
分司且遜休官早
柱史從畱食乳遲
會見小倉編後集
較多盈萬渭南詩

先生築館冶城隈
壇坫爭趨末座來
司馬從官嘗雨立
元戎小隊及花開
後堂弟子聞歌管
西邸英王致酒栢
此日壽登誰不慶
早詢安否遍中臺

送香亭重赴嶺南

昔君溟海我燕京萬里相逢建業城
艸綠冶亭同策杖花明江閣擁彈箏
東山未可畱安石南越重須見陸生
又送離旼天際望白垂白髮入柴荆

重游隱仙庵并詣古林律院承諸君和僕去歲詩
韻見示因復繼和三雲通守四十矣前見其貌似
年少因以入詩今知其誤故復以詩解之

殘花猶未墮蒿萊拄杖濃陰踏逕苔
魚鳥都於吾輩慣江山轉憶昔人來
觀空應叩鋪金地遣累頻斟釀玉醅
歸把清詩慰岑寂一庭繁雨綴青梅

江城朗見玉山來當座朱顏發綠醅
流轉光陰速輪轂飄蕭花絮付莓苔
黑頭子豈輸王簿禿髮余真似賀梅
四十功名非僂晚會看風引到蓬萊

賦得謝公墩

昔聞謝太傅登眺此江東宰物仍高韻
清言見道風早齊東海德晚配始興功
曹植詩多怨羊曇慟復窮閭閻葵扇在
煙靄石城空遠想非無士從游詎有公
一墩當水白三月落花紅更作書生詠
青山夕照中

香亭得雄於其去歲所失小郎有再生之徵一詩
爲賀兼以識異

普門大士感修熏福德兒重乞細君正似吾鄉張太傅

惜抱軒詩集十

今體九十三首

過程魚門墓下作

憶挈柔豪就石渠春風花藥襲襟裾隨珠荆玉多奇士
金匱名山見異書霄漢幾人成令僕滄洲吾道在樵漁
獨君埋骨青山隧長鬣松呼似識余

送江寧郡丞王石丈運餉入蜀

胤座師王文莊公之子

使傳驅天府家聲長地官書名畱御墨急病在衷丹
行受專城寄寧辭報國難天從秦嶺窄身入棧雲寒轉
餉千峯裏傳餐萬木端才猷經事大體骨積勞安憶谷

情世言集十一
趨階序初欣見羽翰山邱嗟歲往風義值江干短髮飄
藤架長歌共藥闌亭皋春寂寞閣道路巘岈涼燠車中
換情懷事外寬吾衰君自壯談笑去征鞍

題夢樓集

與君交久無如我竝到頭童白領髭事業銘鐘都未逮
林泉投絃卻非遲燕關秋氣聯吟袂江寺潮聲接臥幃
五十年間都憶起一鐙廿四卷中詩

送陳東浦方伯自江寧移任安徽三十二韻

衡嶽羣舒地橫江六代都風煙通上下民俗別荆吳駐
節方從化移轅有待蘇生申元四國俗寇豈私吾白下

公初莅黃中信早孚從容文禮樂談笑奠江湖小察羞
誇智訂猷始作謨五年休息意四境蕩平途愛士憐彈
缺知音辨濫竽古風宜護夏偽體闢榛蕪豈以文防政
眞看效是儒甘棠方芟舍瓠子計塞芻 天語褒丹鳳
人心繫白駒皖公先在望泗上且須臾四載俄安宅雙
旌遂載驅同州淮海合分省井疆殊作伯臨諸帥投閒
有一夫登龍慚郭泰伏鵠媿南越江遠林烟澹霜初岸
艸枯遠偕迎竹馬近卽送檣烏回首思鄉郡傾心仰大
鑪土風兼俠武鄰域急軍需狗有生羗逸人無佩犢麤
依仁諸眾願舞德況微軀劇邑將辭醴歸邨更飲醕瓶

開惟說尹禭負其將雛九派潯陽會千峯天柱孤詞源
瞻几杖坐上又醍醐此地朱訾口他時北斗樞旬宣寧
楚尾羽翼上天衢業廣同環海恩周詎向隅形容羣作
頌傳詠懌吳歛

寄袁香亭

時爲塽門同知

同歲書生盡白頭異時江國共登樓蒼茫身世餘孤策
歷落山川又九秋雲出易迷巖曲岫鴈飛難到海南州
卻聞壯事猶能作談笑吳霜拭佩鉤

題王麓臺山邨扇面

谷口停舟傍石林幽人猶隔幾重岑濛濛山氣將爲雨

待長谿流二尺深

偕陳渭仁吳子見朱引恬南濱游攝山宿般若臺
院次日邀釋卓羣入寶華山

九月寒初未擬還江南艸樹正徧斑短筇慣識青巖路
白髮重攜向攝山

萬葉霜凋變錦叢雙巖金碧擁 行宮宮門右畔谿橋
石竟日涼颺響墜紅

密樹陰沈般若臺珍珠泉映井天開蕭條彌勒龕邊宿
一夜橫江風雨來

路掩青山舊孝陵村零黃葉古江乘騎驢共踏秋風裏

新識南宗小院僧

雞犬民家帶柘桑誌公人說出東陽寒山一往無尋處
卻見鷹窠是道場

慧居寺

恭閱

三朝御書

獵獵霜風拂袂斜偶攜僧衲入哈呀山蟠句曲橫青靄
樹自深巖上碧霞霄漢奎章藏鷲嶺人天法會憶龍華
白雲蒼狗塵寰感到空林釋子家

寄吳殿麟

聞其里人欲為舉孝廉方正

天都山下結茅茨閉戶盤桓自命著弟子三千周士貴
公孫五十漢徵遲朝中筐篋將更策天下文章要起衰

聞道洛陽才不世吳公第一始深知

鷲峯寺

寂寂青谿水蕭蕭祇樹園江潮春入郭海月夜當門銀
杏風前活寺有銀杏已死今復榮金容世外尊殿中佛像傳猶江總捨宅時造金色
獨異他像陳隋銷落後來聽道人論

葆光寺

一徑循修竹高低杏靄閒秋風深院桂寒色寺門山龍

象來居少

寺無方丈僧

鴉烏暮語閒故人餘隱迹孤杖此追

攀

方坳堂嘗避喧于此

報恩寺

江上來興甲宮中失委裘升朝君難靖建刹母恩酬風
物長千古雲山短髮秋浮圖三百尺陟級望滄洲

南唐

小朝偃蹇大江東煙月流連六代風建業文房收寶笈
清涼法眼啓琳宮帝都執玉才嫌後天塹浮橋已架空
一聽大梁春夜雨最思花是去年紅

龍江阻風

紫金山外俯羣巒白鷺洲前木葉丹十月清霜天地肅
一江空水古今寒往來未定秦淮宅冷落唯投大澤竿
坐待暮天霞作綺吾生何處不盤桓

憶慧居寺

九聞初鴈在江南一詣靈山杖策探殿角夜明升鷺嶺
鐘聲秋發過龍潭歸攜衣袂烟霞染迴望雲關石樹參
料得老僧居絕頂峯坳時見度風帆

歸舟

風起橫江晚未休躊躇山下送歸舟遠天青白依依日
近樹丹黃颯颯秋早歲經過忘故迹百年死喪憶前儔
老翁萬事投空寂只寫清詩處處留

過黃陂湖

離家百里泛晴川遲速吾心總曠然澹淡風揚初日上

高低山匝一湖圓連邨黃葉叢叢霧舉權滄波面面天
好景一過須記取擬同兒女話燈前

自嘲

冬烘老子木棉裘苜蓿盤邊與古謀曳踵車輪良病緩
拄頤劔首正嫌修雖讐七略無藜火未證三幡愧苾芻
儒佛兩家無著處祇將黃髮邁時流

嘉慶丁巳三月十六日阻風於繁昌三山磯因游
三華菴菴爲僧山若建山若傳爲明進士楚人不
知其姓名國變後爲僧塔在菴左側

青山綠曲逕紺宇帶修林江影高軒覆花光小閣深峯

巔橫落照門外澹春陰不厭風潮阻頻爲淨院尋

勝國傳遺老開山託巨磯三衣藏服尋一鉢寄餐薇名
姓塵寰滅波濤過客稀祇聽松竹韻三歎出巖扉

寄李雨邨

調元

故人與我尙人間曾傷金羈玉筍班地勢風煙難蜀道
天涯雲水各江關偶將文筆傳消息竟謝簪纓孰往還
衰鬢不妨論事業發揮潛德又誅奸

題畫

深谷高巖寺閣局疏林谷口見谿亭亭中恐是龐居士
坐對無埃山四青

未凋林碧發梅紅石壁天齊岸勢窮搖艇更深何所遇
武夷君在白雲中

題夢樓集

春雨高梧灑夜涼夢樓詩卷伴虛堂未知他士堪看否
我自微吟欲斷腸

題韓魏公早朝像

當年秉笏獨書思每進難陳父子詞逮託北門榮畫錦
永昭陵遠夢罨眉

王文成公像

餘事功名到五谿室家累世輯羣黎除將道統千秋重

我夏傾心爲鼓鞀

宋人水殿圖

金波鳩鶴麗秋光高下空明水一方天淨不知河漢轉
玉階風露覺新涼

趙承旨天寒翠袖圖

冷落山花閒竹竿誰言空谷異長安態濃意遠無人見
自倚天風翠袖寒

王太常雨景

沙上浦漁歸煙際邨林閉風雨黯成昏湖山轉清氣
將會夢樓於攝山道中有述

情抱車言集十
太平門外雨初晴又聽新蟬第一聲轉轂年光逢小暑
夾衣天氣似清明山雲近作迎人態僧院歸如返舍情
未死故人重執手舉看藤杖一枝輕

別夢樓後次前韻卻寄

送子挈舟趁晚晴沙邊暝立聽橈聲百年身世同雲散
一夜江山共月明寶筏先登開覺路錦箋餘習且多情
纓頭半箇容吾與莫道空林此會輕

次韻贈左蘭城

我似顏陽尙弄晴子如雛鳳發新聲殷勤老馬途頻問
高下精金市自明共案八關尋至味聯牀三宿係餘情

屬將道域深攀援夏覺文章小技輕

題趙雨亭出關圖

葉君中子謫伊犁趙與有舊省
之葉沒又往致其柩歸

冰雪天山照往來懸旌四見玉門開尊前渥赭顏如管
身是唐朝老萬回

秋至

積雨晴時風滿襟夕陽空院落疏陰暑過秋至關誰事
付與寒蟬樹上吟

自海峯先生喪十餘年龜不至樅陽今年自江寧
循江西上過其故居不勝追愴乃作二詩

往時四海一衡茅頻使升堂命酒肴輕許便當人俊傑

高言寧計眾譏嘲寥寥空宇今羅雀兀兀荒臺古射蛟
艸宿重因天下痛百家新學總譌淆

縱陽山帟枕江濱何陋塵闕只爲君此日羊曇重下淚
百年端木永離羣霜風激激團亭水天日昏昏大澤雲
正是平生停權地招魂當復細論文

松圓老人小景

荒寒空水夕陽流落鴈聲遲近荻洲識取松圓詩裏畫
秣陵天遠不宐秋

松圓谿山亭子

半依平遠半巖扃雜樹逢秋一半零入谷未深林未密

拈來詩思在谿亭

八山

雪餘冰泮日華清試向寒山託漫行曳杖穿林逢客少
解裘登嶂覺身輕丁東石溜巖幽出層疊嵐光樹上明
取作分司隨口句驚人無復謝宣城

徐半山桂

已將僧袂謝塵緣猶有深情拜杜鵑極望湘南天更遠
秋風零落桂連卷

仇英熏籠宮女手持團扇

梅萼香薰靜女旁熏籠煥倚意寒涼懷中不合時宐在

懷輶車詩集
九
憂詠齊紈冰雪光

輓袁簡齋四首

早應詞科稱玉堂出臨大邑見文章流傳政牘吳歛裏
得助詩才蔣阜旁官罷買田如好時身已起塚在桐鄉
祇憐行樂平生地門掩西州澹夕陽

文集珍傳一世間兼聞海外載舟還千篇少孺常隨事
九百虞初夏解顏竈下媪通情委曲硯笏奴夔句漏斑
渾天渾思胡爲者縱得侯芭亦等閑

館閣江湖竝盛名曾苞今古手持衡當關報客無朝暮
下筆噓枯有性情羣輩角巾從郭太公侯小巷候君卿

希光時彥今多少離溷辛勤悵賦成

半世秦淮作水嬉沙棠舟送玉簫遲錦燈耽宴韓熙載
紅粉驚狂杜牧之點綴江山成綺麗風流冠蓋競攀追
煙花六代銷沈後又到隨園感舊時

嘉慶戊午二月十一日攜持衡偕左良宇叔固張
侍喬晴牧素從同游雙谿四子畱宿山中侍喬及
余持衡暮歸憶去歲是時亦與諸君游集于此因

作二首

于嶂龍眠碧玉圍雙谿蟠遶玉龍飛圓隄松響交山閣
曲崦花光照礪屏青艸已埋黃閭骨絳霄還振素流衣

衰羸忝與年年會昏黑猶嫌早命歸

此邦曾住李公麟何處山莊閒翠筠眾壑莫如今據地

四朝誰問管時人

龍眠山甚廣然莫佳於太傅墓前疑管山莊卽此

雨過澗漲

多新響崖闔林開別貯春玉局黃門徒對畫吾曹差勝
得身親

寒食雨

細雨冷風日夜催陰沈庭戶長莓苔山城樹底花頻墜
關路淮南客未來三月晚春悲老物百年後死待奇才
坐看暝色階前合北嚮寒空數鴈哀

哭錢侍御

禮三十二韻

能國惟君子平時讓俊民九苞鳴大夏一鶚降秋旻士
盡歸遺直朝方賞諫臣如何孤有德終歎百其身家世
昆明遠聲名上國珍青編先珥筆白簡奮當仁受 詔
乘輅急當官襪被貧九流分混汙三族責頑嚚始使清
流重終教惡女顰遷官依 日側持節度江濱魯酒師
圍趙曾參罪惑親湘東舜樹蕙滇海臥誅榛脫穎賢名
舊聞絲 帝念新雲霄重起翼風雨又司晨授命官何
擇賢勞事不均更生徒禁闥長孺是前薪心苦非搏石
言高觸秉鈞苟無 光日照蚤與禦魑鄰被薄焚香夜
盤空翦韭春孤危仍不恤溘死又誰論節概今無兩文

惜軒詩集一
章古與倫廟堂虛讜議館閣重詩人昔試儒家法招徠
觀國賓登茲一片玉忝作九方歎晏笑鋪筵會潺湲擊
袂辰江湖漂擊擢霄漢望拖銀遠慰空庭日時烹尺素
鱗病羸增復減兒女學兼姻任道誠無負論交亦有神
祝雞從廢墜乘驥又遑迤宇宙宏才少風霜往迹陳蒼
生卒何望青史豈終淪

題宋院畫林檎孔雀

風舉高枝露葉乾明花暄日鳥情歡世間好處憐儔侶
翠尾張屏盡意看

張呂環選勝圖

何處龍眠勝無如太傅墳嵐光千嶂合泉響四邊分前
月吾行至春風鳥獨聞只憐烟月暝幽絕不逢君

謝蘊山方伯得晉永平八磚以爲研作寶研圖
中三子侍

琢磨新試麝煤烟委臥荒榛幾歲年匣研寶貽安石後
甄泥事在永和前列階才已成三秀入院聲應嗣八磚
便爲越中誇故實不須零瓦問甘泉

螻蟻靈澤夫人畫像

堦維大耳紫髯兄螭首帷中與論兵英氣不隨興廢盡
危磯時蹙怒濤聲

中興天子得成家撫鏡佳兒祀麗華原廟一顏霜露冷
不如蘋藻奠江涯

汪蛟門少壯三好圖康熙間題詠數十家今藏秦
編脩敦夫處屬題其末

世間嗜好總雲烟差有風流翰墨傳長卷展窮階蔭轉
強將衰病附前賢

題釋果仲詩

慧業何嘗不可珍研思處處鬪清新寒山拾得誠難企
正作人間休上人

祝芷塘同年惠書併以新刻詩集見寄復謝

浩蕩君才江漢浮魚龍沙石盡從流豈徒小我吞如芥
更使前賢放一頭集鳳文章遺舊省垂虹煙水澹新秋
圖書跌宕應忘老莫爲悲傷歲月愁

查篆僊

淳

於揚州訪得其族二瞻墓荒翳幾盡爲

脩整種樹立碑旋獲二瞻舊硯於僧舍自紀以詩
屬繼作二首

一團紫壁墮僧扉無復蛟龍引墨飛百歲白虹重吐氣
更從濡染瀉珠璣

形骸石硯孰爲親一臥荒郊一几茵梅壑有靈應附此
諸孫門內接詩人

二瞻號梅壑老人

中興天子得成家撫鏡佳兒祀麗華原廟一顏霜露冷
不如蘋藻奠江涯

汪蛟門少壯三好圖康熙間題詠數十家今藏秦
編脩敦夫處屬題其末

世間嗜好總雲烟差有風流翰墨傳長卷展窮階蔭轉
強將衰病附前賢

題釋果仲詩

慧業何嘗不可珍研思處處鬪清新寒山拾得誠難企
正作人間休上人

祝芷塘同年惠書併以新刻詩集見寄復謝

浩蕩君才江漢浮魚龍沙石盡從流豈徒小我吞如芥
更使前賢放一頭集鳳文章遺舊省垂虹煙水澹新秋
圖書跌宕應忘老莫爲悲傷歲月愁

查篆僊

淳

於揚州訪得其族二瞻墓荒翳幾盡爲

脩整種樹立碑旋獲二瞻舊硯於僧舍自紀以詩

屬繼作二首

一團紫壁墮僧扉無復蛟龍引墨飛百歲白虹重吐氣
更從濡染瀉珠璣

爲胡雒君題說經圖二首圖三人一雒君一錢晦之一陳仲魚

遺經殘缺在人間已墜斯文不復還一髮千鈞餘傳說九州三子尙追攀孝廉郡國同推舉吳越溪山共燕閒若使老翁參坐論頻遭奪席也欣顏

聞名吾未識錢陳應是東南兩俊民最憶半生同研席獨誇胡子出風塵文章經術元同貫場屋徵車總致身他日 聖朝論白虎三君誰是著通人

蘇州新作唐杜公白公宋蘇公祠於虎邱嘉慶戊午八月龔及陳方伯諸公遊宴祠內作四絕句

柁樓吳越壯遊年遺伏編詩歷下前惟有高祠照寒水文章千古寄雲烟

文采風流竝世芳蘇州德業獨難忘激波五宿渾兒戲政使微之羨此堂

端明過迹亦囟囟遺像高樓醉面紅記取樓頭看塔影小山叢桂正秋風

獨餘叢桂小山幽東坡爲虎邱詠也時祠前桂花極盛

草堂橘刺藤梢裏官閣清香畫戟中繼蹟白蘇賢將在老夫乘興便遊東

穹窿山真一觀

山前雨歇日初升盤道穿松出霧登匝地湖光連海曲

情托車言集十一
垂天雲影落吳興遙遙上古思蟬蛻澹澹秋空縱鳥憑
周覽便辭高閣下幾時重宿看神燈

鄧尉

盛衰人事總無常鄧尉梅枯半作桑賴有山川長不改
倚欄依舊見漁洋

古柏菴

高榦枝稀似立虬裂柯橫草翠還抽七株嘉慶三年看
更歷人間幾百秋

石湖草堂

昔爲祠宇記今訪石湖園烟水長如此風流向古論堂

開懸石趾潭隱曲巖門滿谷芳幽桂虬枝誰與援

楞伽寺

上方雲氣上寺塔上方巔杖策層層石凭欄面面天
翠華嘗駐此丹閣故依然吳越吾初到微茫眺海壖

東浦方伯邀與同遊西山遍覽諸勝歸以二詩呈
之

南北吳山又越山排雲點黛洞庭間乘舟秋水天空闊
拄策高巖徑曲環石谷漫泉斟乳液琳宮殘碣剔苔斑
歸來夜夜餘清夢攜得烟霞到市闌

海內詩才各長雄幾人真嗣浣花翁草堂鶯鴨聊宜我

惜雅華詩集十
十五
碧海鯨魚卻付公松石相看懷舊日烟雲同泛又秋風
極知老遇斯遊最便腐柔毫寫未工

謁德馨祠

先人莅政浙江潮廟貌湖山鎖寂寥近日守官新檻楯
百年父老戒蘇樵青編史傳悲思極白髮秋風道路遙
遺像幸瞻垂老日獨慚無狀負登朝

登松篁嶺酌龍井泉與吳江郭頻伽朱鐵門及持
衡同遊及暮乃返

天宇青蒼秋氣悲松篁嶺上拄藤枝西湖烟景當巖下
北宋風流似晉時龍井甘泉長不減虎溪送客竟何之

幸逢佳士聊盤倚月上西林隱半規

虎跑泉觀東坡詩刻

神功虎穴作龍湫乳竇杭州與潤州一勺寰中尋廢寺
廿年招隱記閒遊才誇新句蘇夫子已誤前身戒比丘
飲罷清甘應有悟高巖風葉墜當頭

城隍山

秋風吹蕩亂雲開曉踏吳山頂上來左右江湖遙會合
東南天地此徘徊宋宮衰草烟中白滄海驚雷勢盡迴
都邑且誇今日勝趾前城郭抱樓臺

曉過蘇隄作

蘇公隄畔綠烟堆行上激波似鏡開秋柳霜風餘旖旎
水亭金碧略傾頽浙東峯影遙空見湖外鐘聲四面來
更入南山深處住擬將淨社結宗雷

將去杭州項秋子

壩

邀餞余及持衡於其宅同會

者孫心蒔侍講

效曾

孫貽穀觀察

嘉樂

潘蘭垞道

長庭筠

以一詩畱別諸君

絕境東南偶杖筇西湖十臥寺樓鐘無邊風月隨千里
不盡溪山任萬重樽酒偕來尋舊夢雲帆何處計前蹤
世間那有長相對畱語天涯慶此逢

戊午八月廿六日過蘇州囟囟一詣虎邱後二十

五日自杭州回與馬雨耕及持衡重往竟日登攬

因題八韻

虎阜前朝寺蜂房四面樓檻前山杳杳巖下水悠悠負
海帆斜出生烟郭正浮地標鈴塔峻天納劒池幽捨宅
希塵外開堂問石頭樹凋吳苑綠雲是晉時秋一幕莊
巖界重經澶漫遊不隨零落候金粟爲余畱

別張慕青吳竹堂兩同年

此身千里一飄蓬來值姑蘇兩寓公宿草堆中思故侶
菊花樽畔賸衰翁各隨署膝尋山好莫苦心脾索句工
盡醉便將孤棹遠胥江西上水浮空

無錫贈王錫公

吳山秋色舉杯前各醉人間七十年一別相逢應更少
只今同酌惠山泉

宗人無錫半塘令君置酒寄暢園漫成一首

九龍山下好園林雲物秋來澗戶陰迴棹江湖孤客迹
舉杯風雨故人心青蒼石樹凌空色隱見巖泉注壑音
此地買田陽羨近總將遺跡付登臨

丹徒值雨夢樓邀挈持衡及江鳴韶同遊焦山登

東昇樓

滄江僧榻壓龍宮二十年前一宿同偃蹇青山長待我

飄蕭白髮又乘風檻前萬頃凌天外樓上千生說夢中
何事驚濤翻急雨苦將悲壯撼衰翁

題花塢夕陽遲圖

誰辨韶光速與遲無情有態問花枝分明義御長停處
正在凌雲一笑時

張惺齋見示先贈侍讀公西阪草堂集輒題一首

數卷清風迴出羣正如縹緲敬亭雲宣城古是詩人地
張氏才多奕世間踰嶺奇遊蘇玉局登樓傷別杜司勳
通家獨恨升堂闕聊比中郎誌郭君

方坳堂

昂

以巡道提調南闈被

詔擢貴州按

察使僕適遊吳越逮其出闈不及祖餞以一詩追
送二十八韻

千山百越郡萬里五溪源地遠開都會才難任幹藩
皇仁同近輦使者命乘軒道在儒生勇人依執法恩繡
衣將日月襟被共朝昏一夕朝 青瑣三年住白門
帝咨方略盛民戴德風溫涕泗秦淮水徘徊禁掖垣
歸期仲甫急病且臧孫帆泝三江上塗窮五嶺垠秋風
彭蠡鴈落日洞庭猿志壯行無繫時艱事有原楚郊嗟
獸駭蠻洞聚蠹屯太乙迴西指將軍據右尊風雲霾戰
壘歲月未麤韃封事參降畔夷情雜詐諼喬良今屬汝

頗牧不須論辱好如昌歆瞻風接芷蓀烟開江總宅草
長謝公墩半榻棲荒寺聯裾訪廢園極知東壁蟋豈偶
北溟鯤適越才開艇興賢正閉闈盤遊淹帟履情好隔
筵墳想像登車節乖違祖帳罇丈夫矜大志兒女謾銷
魂國伐書金鼎田家醉瓦盆所欣光事業非僅賴平反
寄望天涯路因歌江上邨

阻風三山夾因偕陳碩士及兒姪遊三華菴菴內
牡丹頗盛而僧不知惜也

巖松塢竹俯江皋小檻憑虛散鬱陶南障近圍春穀縣
東風遙送廣陵濤堂無鐘梵從僧嬾徑有苔蹤記客勞

冷落國香聊與慰午晴扶向石臺高

又寄方植之一首

草青雲碧接孱顏一徑深林記其攀步履只如前兩歲
停舟仍在上三山巖空松響舍風急春盡花枝著雨殷
寄語閉門千帙畔夢魂曾否到江關

哭陳東浦方伯三十二韻

自古思賢傑因時各長消孤生情易感偶合與嘗饒老
我依經肆逢公駐使輶一從捫蝨話屢歎阿龍超九牧
分潛霍三江帶射洮憂勞中野瘠甄鑄在城佻移轉
天書重周流水國遙紫闈遲覲履白旒促歸鑣士尙

崇三肄民懷奉六條縱非情合契應惜韻孤標昨歲舟
同載秋林葉始凋登臨雲漠漠唱詠水迢迢山勢蟠吳
越天風送汐潮援豪昔賢墓解帶野僧寮文字鈔榛碣
泉源酌木瓢乾坤孤過客今古一終朝北闕求衣切
西垂擐甲敕殷憂分聖代得佐豈虛朝未竟銘鐘鼎
徒思芟琇瑤龍髯雲去路鶴語雪寒宵秦杵俄停相
虞廷正罷韶滄洲波浩浩空宇氣寥寥六代烟霞郭
三春士女撓神徠靈雨冷迹在綠蕪蘇車斗容凡物堂
階切久要敢云當虎眦深辱好蟲雕江月今弦魄吳颿
舉過船出迎周士披哀和楚巫簫貽厥爲箕近恩斯作

室翹故人留白首賢子尚青霄盡此平生痛從今道路
遼陳詩動冥漠帷帳颯風颺

孫淵如觀察 星衍 萬卷歸裝圖

自興雕板易鈔胥帑冊雖多亂魯魚君白石渠繙七略
復依官閣惜三餘世推列架皆精本我願連牆借讀書
政恐衡山承召起牙籤三萬又隨車

第 35715 号

平成 3.11.22

聖和學
園短大
圖書館

928

七

5

室翹故人留白首賢子尚青霄盡此平生痛從今道路
遼陳詩動冥漠帷帳颯颯

孫淵如觀察 星衍 萬卷歸裝圖

自興雕板易鈔胥市冊雖多亂魯魚君自石渠緡七略
復依官閣惜三餘世推列架皆精本我願連牆借讀書
政恐衡山承召起牙籤三萬又隨車

第 35715 号

平成 3.11.22

聖和學	928
園短大	七
図書館	5

号	第
SS 113	期平
	学味望
	大就因
	版書圖

